



嘉興府志

ル 5
1574
31



門凡呂5
1574
卷 31

嘉興府志卷五十九

嘉興府知府張化新

平湖縣

孝義

明

陸宗秀宋擢密副使旋秀九龍縣令

友愛甚篤承業甲兵擢監軍

至家師曾仁宗御極引見便殿

授工部尚書

...

嘉興府志卷五十九

嘉興府知府善化許瑤光重輯

平湖縣

孝義

明

陸宗秀宋樞密副使旋吉九世孫有至行與弟宗達宗俊
 友愛甚篤永樂甲辰應賢良詔與陳繼等二十三人徵
 至京師會仁宗御極引見便殿宗秀方巾布袍舉止中
 度上異之問曰如何則天下太平宗秀頓首對曰皇帝
 親賢納善大臣秉公持正自然太平上悅曰好言語畱



京師月餘以疾辭賜銀幣還正統五年歲大祲出粟麥二千九百餘石助賑賜敕褒美表其門曰尙義子珪見

後分省人物考

沈昊字孟璋性孝友奉諸母比於所生撫異母弟妹無間同母有弟孟暹以誣被逮昊挺身代行械至淮上會淮撫素重昊奏釋之同逮者皆賴以免

吳志

孫佐鍾鳴遠潘璧正統五年饑佐等與陸宗秀各出穀麥二千石助賑朝廷勞以羊酒旌為義民復其家三年

劉志

陸平平湖程志字國平好施與處事有斷里有訟者爭就質以解洪熙改元歲大饑民食草木平出粟作粥食饑

者多全活正統壬戌至景泰乙亥屢饑前後捐粟五千

餘石麥八百斛佐有司賑濟同時有陸平世陸祥者亦

以輸粟助賑詔並授散宦旌其門曰義民

兩浙名賢錄參海鹽圖經

吳志

江濟字伯與宋丞相文忠萬里之裔正統五年敕各省府

州縣置預備倉民能出粟佐官者旌其義復其家濟傾

家得粟二千一百五十餘石輸官璽書褒獎表其門曰

尙義

平湖朱志案江濟又見嘉興何志

陸珪字廷玉嘗代輸一邑賦以寬民力景泰六年饑疫珪

與弟瑜瑾共出穀五千餘斛賑之詔授珪廸功郎兄弟

四人皆賜宴光祿珪以德義信於鄉鄉人有不平事皆就質不至官府珪嘗與沈吳共建學宮落成日知縣羅榮醮酒祝之曰願兩家世世科第不絕果如所祝兩浙名賢

錄參徵

案共建學宮事徵獻錄作沈珍與陸宗秀宗秀珪之父珍吳之父未詳孰是

沈渭字可閒父吳與弟昇友愛昇遣二子琮肆從師不惜貲貲罄渭出已貲治奩具嫁諸姑暨妹無嫡庶皆先父意為之以子榮封工部主事琮肆榮俱見列傳平湖朱志
馬昇博綜典籍有經世志聞靖難兵起遂隱居以父遺田宅讓諸弟別築一椽於溪南號溪南老隱著溪南集子

暉 暉 暉 見列傳平湖程志

屠機字汝敬歲饑兩輸粟賑濟例得杜者階服辭弗受嘗雪夜過淞江聞葦澤間有呻吟聲視之見一人手足被縛命舟人負至舟解縛易衣以火溫之久始蘇知為句容商人被盜劫者畱居踰月辭去尋以百金酬不納以子勳贈刑部尚書勳見列傳柳志

沈燮字泰夫天順時人父樗以資豪閭里獲罪論死燮徒步走闕下訟冤拘囹圄者八年疏七上乃得請馳歸甫至吳門計明日獄且決號泣祝天忽大風起一夕抵武林樗得減死流嶺表後赦還徵獻錄參平湖朱志

曹校字世儒以貢授光祿寺丞性至孝篤宗誼子光有傳

煒進士任知縣平湖高志

俞巘字廷貴有行誼宏治間知縣熊卓引與計事民輒稱

神明或干以私遂謝勿與通里人諺曰郭東俞生當春

握冰明詩綜

沈溱字惠水先世自武康僑居東泖至溱徙石莊為人倜

儻有才重然諾喜賓客明正德間為文思院大使以事

忤劉瑾被杖下獄欲置之死有韓松鄰者與溱善時同

郡項忠屠勳皆在朝松鄰詣泣白其寃得釋瑾恨未平

將復杖松鄰泣請曰繫獄數月再杖必死愿以身代溱

得歸未幾卒平湖朱志

楊陞字敏夫諸生嘉靖間倭警祖母與母倉皇避匿陞咫尺

不離父歿諸弟幼陞撫教曲盡友愛平湖程志

陸宓字子深御史琳子性孝好行善歲祲捐私蓄助賑家

落質錢以施無倦色著有捫心錄運甓餘鈔平湖朱志

俞錦字克昌好義自飭從子彬貧析產過於已子故人金

燕死無以殯其子坤就錦鬻田計所需給之焚其券戚

黨十餘家藉以舉火嘉靖間築縣城知縣殷廷蘭以其

居當城趾欲廣數丈請所值錦曰城以衛民可以一人

居煩縣官費乎即自毀庭寢二十餘間知府劉愨顏其

門曰義門

平湖程志

郭球字友虞父早喪母陳目瞽球以舌舐之漸明嘉靖間倭入寇負母逃中塗遇寇寇刃其母球以手格之兩臂受刃血濺衣會縣尉率兵至突圍出母卒廬墓朝夕哀痛有烏數百巢其樹人以爲孝感天啟間詔旌之著有

舜鳴集

平湖程志參
構李詩繫

俞永言字懋孝諸生少孤家貧與兄敷言篤志績學相師友母病危禱神愿以身代母亡事無大小一稟兄兄嫂

繼歿遺孤教學不異已子

平湖程志參
平湖朱志

沈思孝諸生家貧竭力孝養父患疽吮之得愈母瞽昕夕

顛天日復明

平湖程志

秦涇字汝清幼喪母哀毀甚服除像事之如生及事繼母

失愛涇益謹撫異母弟篤至卒回母心父病

平湖程志
作繼母病

隣火及卧所涇叩頭顛天風返火滅父歿廬墓終喪知

府鄭登高以聞未報卒

劉志

張濤字悅清有隱德娶婦盲相敬如賓蘆瀝場大使逋官帑二百金繫郡獄濤代償之越人駱某好學貧甚以勾軍匿濤所得脫後貴以百金酬不受友人趙端嘗貸于濤及償攜七歲孫漢同往濤器漢反所償金以佐讀書後漢爲名臣孫熒見後

曹臬家貧館於某家夜有叩門者審之則處子也拒不納
明晨以他故辭弟早亡遺一女厚嫁之舅氏死周其養
孤

韓文字本質以吏員授羅浮倉官前官逋糧久繫獄文歎
曰三十金關一家命盡出所攜資代償得釋文六十無
子南雄知府貢珀贈詩曰捐金不惜緣無子垂老猶忙
為有官此意只教知屋漏老天曾肯竟漫漫後果生子
相任通判贈文如其官八十餘卒以上平湖朱志
陸序字可松為某所中坐死得雪後某坐他法序為排解
某愧服序嘗出粟米千石賑饑授七品秩子槐別見湖平

朱志

陸錫命字仲敬母元病目吮之復明以貢補內閣中書山
東災御史往賑錫命捐穀千石佐之御史上其事敕建
坊旌表嘗捐田百畝贍族親友待以舉火者數十家率
稱貸為之以子清原贈御史袁志參平湖朱志

陸鑒字元朗諸生為叔父堯俊後家海鹽本生父堯化母
傅生養死葬獨力任之海鹽續圖經

馬瑀字朝儀弟珣運漕舟覆傾家償不足部使褚按治瑀
詣代白得免有大猾誣知縣周某得贓萬計瑀上書撫
臣得不坐歲禮民多流徙瑀乞知府詳免是年稅卒減

其半後贈參議子千乘孫維銘曾孫德灃俱見列傳平湖志

程志

陸垕字載民博學隱居好施與歲饑戚黨貧者賴以舉火至鬻產不吝有司奏旌其義

陸基誠字存卿諸生戊子大饑傾困以周族戚為粥通衢食飢者復設冢地市棺收瘞路殍度大荒後必疫劑藥以待已果疫全活甚眾以上平湖朱志

沈維錡字震躬諸生有才幹嘉靖丁巳倭警倉卒兵不得集督撫胡宗憲設計誘降時倭屯沈莊眾莫敢往維錡請獨往說之已大兵至勦之維錡實首功宗憲欲疏請

大用維錡固辭但奏免沈氏十年田稅平湖朱志

孫璧字朝瑞以貢授吉水教諭遷伊府教弟璽如嚴師至

老友愛無間迎養寡姊五十餘年妻父王某無子籍其遺貲擇其族之良者授之以承其祀徵獻錄

林雨字少巖僉事桂子值徐海亂產中落性好施與鄰里藉以舉火弟病以產讓之從弟無歸者咸周之以貢授溧水教諭遷代府子楚能承父志諸負券悉取焚之平湖志

朱志

沈宏光字子懋諸生侍父疾衣不解帶者數年痛不及事母見手澤必泣感里徭之弊作均徭議晚悟天道元氣

成于貞人心愛德歸于正作愛正編累贈翰林院修撰

子懋孝見文苑懋嘉字會真著四書說白巖稿劉志

馬千里字伯良諸生歲饑請賑全活萬計遇人難必力救

季父珣無嗣迎養終其身課弟千乘不以家事累之弟

貴事兄若嚴父居恒靜坐一室左右圖書怡然自樂封

文林郎子維銘見列傳平湖朱志參

沈維錡字望洋嘉靖間連患旱蝗隨父壕設糜賑饑全活

甚眾子民範字寅所有醇行不以子萃楨貴改其素萃

楨為奸黨所搆民範曰小人所憎者君子我何憾萃楨

見列傳平湖朱志

陸珂字子珍族黨有貧不能婚葬者悉思之輯格言勗子

孫兩舉鄉飲不赴子文典字希堯歲饑捐貲設粥以食

流民還遺金讓塔基田輸葬地樂善不怠一如珂嘗手

書仁廉公勤四箴訓其子長庚後珂與文典皆以長庚

貴贈布政使長庚見列傳平湖程志參

陸光宅字與中舉人嘗闢天心精舍集名士講習性好施

賑人阨因而自食脫粟衣布素臨歿書無極太極四字

王龍溪曰與中之學以仁為本

劉麟字子仁力學修行好施予三族賴以舉火者甚眾妾

李氏父老無依厚遺遣歸以孫廷元贈右都御史

胡濂字碧源有隱德以孫士相贈參政子友忠事母孝年

九十有九贈如父官士相見列傳

以上平湖程志

楊志英諸生母吳沉痾數載晝夜侍奉不離側母歿盡哀

終歲依父寢非再三命不就私室家貧同婦食麤糲供

甘旨束脩所入悉進父居父喪哀號嘔血感動隣里嘗

遇異人授養生術至老益康健一日晨起盥櫛端坐卒

平湖朱志參平湖程志

馬炯字世望少穎敏父官廣州遣吏解軍餉舟次彭蠡為

逆藩所掠炯方就試聞之即馳赴父所會王守仁平逆

藩諭知廣州銀猶存遂請牒訴當事不得復走訴京師

卒得白以貢授六合訓導遷連山教諭不赴著有諸史

辨疑

平湖程志

過厚幼喪父事母孝父遺產為兄蕩費僅有存者厚復讓

映取瘠從父槐無後厚以序承其祀所授千金分恤族

之貧者鄰人妾死被誣訟夜遺百金乞白寃却之及庭

鞫力辨得釋著有性理解子庭訓見列傳

平湖朱志

俞懋修諸生少跛父母不愛娶婦戈賢而嫂嫉妬日搆懋

修夫婦父母遂惡之一日父出母錮懋修夫婦別室不

與飲食從母姚陰出兩人僑寓武塘集里中兒授句讀

婦縫紉以支旦夕顧時時念父母不置相對泣曰甯死

膝下何忍離父母懇族人為請于父父稍悟得返母亡

嫂主家政進麤糲父不能堪懋修與婦恒拮据竊烹鮮

以進尋出為人後常迎養父父益悟欲奪兄所侵嗣產

歸懋修懋修泣跪陳不可亡何父與兄嫂相繼亡懋修

營葬以兄嫂耐焉兒子多外侮力庇之兒子死撫其孤

寡子允昌語及父母事輒流涕

平湖程志

俞志臯字蓋卿母早卒父有足疾弟幼志臯授徒以供朝

夕晚以進士謁選卒于潞河蕭寺

平湖朱志

陸橋字元建講性理之學工詩文族有景賢祠創立義田

橋力為多著有石居集

平湖程志

毛應銓字元衡幼有至性家貧父善病晨起往塾必以父

藥餌絮語家人灑淚而出暮歸同父卧抑搔疴癢衣不

解帶事母如父束脩所入悉以與兄母亡廬墓三年以

舉人署安吉教諭陞國子監學正遷禮部司務仕宦十

年居無一椽至老與兄同舍子湛見列傳

分省人物考

馮伯禋字欽仲貢生敏効次子萬懸丙午應天舉人少稟

至性嘗斷指療母疾母卒伯禋嗣叔父敏勛例不守制

泣曰伯禋何忍獵名忘母遂不赴舉與兄伯禎友愛甚

篤撫孤姪如己子著有虛舟蓬門諸稿

時敏字恥負居父喪盡哀踰三十

哀志作三喪妻誤

喪妻獨居四

十五年室知懸罄或贈之金不受平湖程志

馮伯禮字節之太僕卿敏功子敏功卒巡撫以下賻之金

伯禮遵遺命以築寶應護堤事見敏功傳與妻查事母

孝周恤貧困無所吝後卒于燕子洪業字茂遠事母能

養志母卧樓火洪業冒烈焰負母出頹焦著有易羨睡

庵六書耘庵彙箋浙江通志參平湖朱志

胡士奇字重之弟士章少不學士奇設父主跪泣責之遂

感悟相繼舉於鄉士奇擢國子博士兵部司務以註誤

謫仙遊訓導尋卒士章任太湖知縣年餘即歸割產贍

嫂迎養寡姊撫兄子成立分省人物考參平湖朱志

劉希聖字思睿性孝友母病夜不寢三越月兄弟五人析

產獨取其下者嘗遊白下拾遺金于逆旅坐候其人還

之以子廷元贈兵部尚書弟希賢字東溟孝友如希聖

事繼母必躬進膳凡事身先婢僕

施應填字士和少時代昆弟徭役建平徭諸議嘗路拾遺

金還其人贅于曹曹富無子曹卒應填視舍歛哭之去

貲悉歸曹族喜施予不問家人生產以子鳳來貴贈大

學士

陸長春字景陽長庚從兄性孝友以父文昭鰥居時集高

年置酒以娛嘗贈友人劉某金為其子娶婦後其子豪

嘉興府志 卷五十九 平湖孝義 七

于贊長春絕口不道前事萬歷丁亥大疫早起見五鬼
驚語曰正人也當避之家中竟無染者

姚應竣有純德訓導定海視諸生如子弟子舜宣字華樓
仙居教諭孝友敦行知縣王若惺敬之數造廬訪未嘗
有私請孫之鳳字叔瞻諸生著四書粹言尚書定解

陸文相字春臺諸生父賓橋坐累論戍繫獄文相七歲見
縣令出樊輿呼救令感其意釋賓橋賓橋有隱德嘗還
人遺金孫懷玉見列傳

馬香幼喪父母刻苦自立而兄老迎養殯葬撫從子如已
子子鳴雷鳴霆別有傳

以上平
湖朱志

陸萬達字天相親歿同弟萬達廬於墓皆諸生性皆好善
昆從孤寡贍之又捐貲置產佐族婚嫁喪葬萬達字色
幼穎敏善詩文後從徐曾源遊究心性之學學使洪
承疇亟稱爲文行兼修明史列諸孝友傳著有文惠集

袁志參平
湖程志

陸燭字時秉諸生父相建昌府經歷知宸濠將變乞歸燭
事父孝父病刺指血投藥中愈遭喪廬墓三年

馬維鉉字鼎甫善承父志撫姊子陸瑞徵爲之婚娶舉戚
屬三喪以貢授保昌訓導卒官贈刑部郎中子德禮德
澍孫嘉植德澍字商雨扶父喪歸里哀感路人嘉植旣

貴儉約如故徒步里門有司造謁皆拒不納累贈吏科給事中德豐嘉植見列傳

陳增字進吾貢生少英敏有才名屢試不得志閉戶著書學宮燬捐貲獨建華亭徐文貞階表其墓

張熒字恕齋監生母歿哀毀不支父病篤禱於神願減算以延孫明昌舉人復昌監生舉鄉飲

以上平湖朱志

郭日乾字懋學孝子球子諸生嘗客長安友人陸萬境死於道負之歸旅邸學使蘇濬旌曰尚義真儒著有青蒲

草元經史參同諸書以子紹儀贈御史

平湖程志

陸懋學孝友敦族誼倡立祭田子又機孫上瀾見文苑

平湖

朱志

倪承裕湖廣參政輔曾孫友愛兄弟讓產代運糧家落讀書不輟著性理箋旨子二秉元舉人好義急公籥元見

列傳

吳志參平湖朱志

倪維城字北鑰諸生少壻於陸與妻弟長庚相砥礪如嚴師蘆漑場竈戶官吏腴削不聊生維城與趙志奎等上

書鹽使者釐剔之子鍾瑞見下

平湖朱志

曾烈字元承事父至孝待宗族有恩嘉靖中以貢任吳江訓導諸生貧者輒分俸周之歲荒設粥又委曲勸賑上官甚重之遷澧州學正家有田六十餘畝割其半以與

兄若弟 徵獻錄

陸大銳字恒甫巡撫萬垓長子謙謹儉約不與戶外事萬

垓嘗寄俸百金越六載歸原封如故弟大鏞字宏甫官

鴻臚 選舉表作 年十三隨父之任舟覆洞庭入水救父

須臾偕出若有神助然當萬垓撫江右時大鏞家居心

動亟馳省母母果病殆禱神請身代得甦生平純白不

存機械 平湖程志

陸瑞銓號宇平諸生父傳教少貧嬰患難深自刻厲起其

家訓子孫為善瑞銓生而好義值歲荒平糶煮粥全活

甚多族繁衍或不能舉火捐田入宗祠分給之故人子

無所依輒為收養毘陵舊族有母子漂流自鬻為傭者

為贖而歸之子之祺有傳 浙江通志參

陸廷揚字西來天啟時為中書避亂移居海鹽半邏姑早

寡迎養終身友人沈位中卒撫孤成立 吳志

倪虬字六元負才重氣節縣中徭無定律正差雜泛率脫

豪右科貧弱虬釐剔之為民請命撫臣善所陳條議著

為令著有雲林集新安三楚記遊 吳志參平

張沖元字完初性誠樸嘗至湖州以物付質庫及贖歸發

篋檢之浮三百金亟往還之後家漸饒歲大饑出穀千

餘石助賑建始祖忠獻祠于蒹葭圍置田贍族以季子

治洪贈鴻臚寺序班長子長生諸生性敦厚不屑屑計
生產逋其租者恒置勿問舉鄉飲

平湖高志參
雅坪文集

葉方宸字遇之天啟乙酉舉人與兄方寰樂善好施里中

稱葉氏二長者

樞李
詩繫

趙科字南泉貢生崇禎間歲大祲捐粟以賑縣令旌之

平湖

張志

曹繹祖字之采諸生崇禎辛巳大饑出粟三百石以賑子

五長穎洙字系宣天啟丁卯舉人官永豐教諭次穎泗

字仲宣崇禎壬午舉人鼎革後捐金贖族眾羈繫者姪

孫元家監生敦品行

平湖
宋志

俞文溢字以忠諸生撫教庶母弟有恩義篤學自守意所

不可輒義形于色不妄交以道義相切劘者終身無間

以貢選入京師卒

平湖
張志

曹伯來早喪母事父孝妹纔數月撫育遣嫁踰于己女兒

歿遺貲厚無子伯來仲子序當嗣嫂意他屬從之及嗣

子中落歲具薪米供嫂終其身

袁志

曹鐘鳴字洪聲戚屬朱某以田質金後請售鐘鳴曰不可

子之家數口賴此以生不索金而歸其券

平湖
朱志

陸倣孟字泗臣諸生營父墓于馬鞍山為豪所發倣孟薙

髮毀形誓不俱生訟之官不直伏闕抗疏詔下法司勘

實置豪于法

平湖朱志參
平湖張志

陸溶原字嗣安少為諸生負經濟才崇禎末伯兄清原殉

國難遂無意人世結廬父墓側不入城市

吳志

過銘盤字伯新廷訓子崇禎庚午副榜才名重公卿間庚

辰歲饑建平糶議貧民賴之縣有利弊直言無顧忌

沈瑞盤字德載性友愛析產以腴田讓弟由諸生入太學

不第歸次維揚聞弟瑞鑿死倍道歸慟絕未幾卒著有

大易廣義子源浹字永叔倜儻有氣節遇事敢言以子

棻贈知縣

顧之琦諸生父其志卧病三載之琦侍奉湯藥寒暑弗歸

私室父歿哀毀不食三日乙酉城陷母曹年八十五不

能行之琦守母不去身被數創而卒

以上平
湖朱志

馬文治字遠之工詩文游京師三十年葉文忠向高嘗疏

薦之不果用歸家杜門以賢良徵不赴乙酉歿于難

平湖

張志參
上遺詩

俞煜字君三崇禎丙子舉人幼孤善承祖父歡弟光翰蚤

卒恤嫠字孤無少怠好讀書通堪輿家言

楊兆梧字非棘舉人少孤終身哀慕有師儉堂稿贈清豐

知縣子燦別見

以上平
湖朱志

倪士顯字慶雲家貧性好施助戚族婚代鄰人償鬻身值

友許某夫婦無子老無所依生養死葬之子虬別見湖

程志

沈紹閻字巽仲歲貢生葺宗祠廣祭田以事先贍族

平湖朱志

胡嗣璜字映日從父士相平白蓮賊嗣璜參謀畫晚歲隱

居北郊為野人衣冠詩有墨龕集子偉字松侶諸生居

父母喪哀毀甚友愛弟不忍分居嘗捐金免陳某鬻妻

償債性嗜學輯明稗三十卷

吳志

劉亮采字德儼兵部尚書廷元子監生廷元被京察論戍

亮采走京師訟寃當事見阻鬱鬱成病卒先是學宮圯

亮采捐千金為倡

金台拱字星侯汝礪子諸生母病危刺指血和藥得瘳弟

岳貧代為輸糧終其身

以上平湖朱志

朱勝忠字守碓全公亭廣懷里人為鄉里師萬曆二十六

年母患病奉湯藥未嘗就寢後嘗糞知病殆乃告天割

股著有勸孝歌唾餘草舉鄉飲賓子順碓躬耕奉養天

啟元年從父往山陰白楊里省墓遇盜以身蔽父願代

受刃盜兩釋之

當湖外志

薛仲猷推官振猷弟性友愛讓遺產捐蟊螟澗田作漏澤

園

平湖朱志

陸憲字元宿縣丞溥子諸生性豪邁喜賓客善論古今事

謂醫可濟人遂通其術子燦為濟南推官迎養于署國
破同燦闔門殉難事見燦傳後孫隴其以衣冠葬于書

圩墓左

三魚堂集

許丕祚字芝裘諸生少孤力學工文重名節乙酉秋為亂

兵所害門人李慶乙哀集所作名拙庵遺稿弟丕猷字

元震著有稽古類言

乍浦志參九山續志

邵言字龍橋庠生好施與世居褚涇隆慶間歲饑平糶全

活甚眾褚涇僻在治東自析縣以來田瘠蕩蕪萬厯中

獨力捐貲開路斥水兼濬支港早潦可耕其地至今名

邵家車路鍾彝夷白堂文集載其事

參平湖路志補纂

國朝

金式玉字藍珂性孝好濟人讀書暇輒侍父母側如嬰兒

訓導壽昌創立義田貧士以緩急告必應尋舉于鄉集

貧士舉券焚之成進士即歸教弟璞玉朝夕相切劘居

母喪哀毀踰月卒著有律呂新書註三易通四書人物

考璞玉字柳城貢生工詩賦季弟尚源字梅格諸生式

玉卒產中落公私所需悉獨任之通性理善音律歷數

之學

平湖朱志參平湖張志

朱濬字文毅監生二歲失怙事母以孝聞母有怒容即長

跪請罪祖國孝純厚有學行崇禎甲申後不與世接高

年病足出入必親扶持世父彤一久厝淺土慨然任葬
事雍正九年歲祲倡捐賑饑

路志

湯自梁字維京舉人年十二母病割股入藥乃愈久之痲
露父紹祖戒之曰非中道也然心憐之伯兄茂先遺孤
在襁褓撫之成立從兄元纘無子歲贍之

劉維恒字滌凡諸生乙酉縣被兵死者道路相枕藉維恒
偕從子棕率僕從收瘞至一千四百三十七人時河畔
無行舟炎穢蒸灼維恒出入屍中無所忌巡撫聞其義
欲上聞以旌辭

以上平湖朱志

沈廣字棗洲號輪齋庠生淹貫羣經尤邃易理少與其兄

貢士燻友愛無間言戚族有相構者諭以片言輒解鄉
黨尤重之

當湖人文逸

陸瀚原字嗣暢貢生少有文譽兄清原殉難後獨居蕭寺
枕席皆淚痕年三十妻亡不更娶歲饑民洶洶思亂請
于縣勸富家減價平糶民乃定晚年為臨安訓導諸生
有貧逋稅者代納之知縣奉檄造戰艦多科派瀚原與
之爭罷歸

平湖朱志參吳志

金赤字如斗市井人也父早卒奉母必具甘旨有不懌輒
長跪不起必得母歡乃起有二女母以字人貧甚不能
舉火赤戒女不得于母前有怨言

平湖朱志

沈心培字存齋諸生家貧授徒養親父下急有室後猶時受杖居母喪大慟嘔血不止卒

平湖張志

李慶乙字秋水少孤貧力學入籍海鹽後投牒罷諸生改名杜字龍門友人郭襄圖以事繫獄慶乙周其家中夜奔至獄左右之郭亡命吏捕慶乙榜掠下獄戒獄卒偵所與勞苦人欲盡羅織之慶乙裹創僵卧不為動會有援者得釋歸歸三日卒給事馬培源銘其碣曰義友李

君之墓

平湖張志參九山續志

倪鍾瑞字青翟舉人性温厚有度嘗有人夜匿其家家人駭逐鍾瑞曰無庸徐詢之知為追呼所迫遂代之納且

厚贈之鄰羣兒盜園笋見之曰可徑取毋驚惶也眾議

開河鍾瑞捐資獨濬之

平湖朱志參西野筆譚

張甫字伯宣諸生讀書不求仕進輯族譜建宗祠置祭田為族倡生平樂善好施壽九十無疾而卒子兆治字枚

璧亦諸生工詩有粵遊藁

浙江通志參構李詩繫

陸本字天全諸生父肇淳久病本扶掖抑搔不離左右父歿竭哀奉母得其歡心撫幼弟妹成立以長子光旭封

御史次子光曜貢生官景甯教諭光旭有傳

平湖朱志

嚴嘗字次良少能文連江知縣劉希夔奇其才以女字之父客死遺產悉讓諸昆奉母盡孝以子思位 贈檢討

平湖張志

張著字形先諸生少英敏負大志甲申後棄舉子業避蹟

甬東王季重秦汝翼譚元孩皆尊重之為人和易好善

哀窮賑乏不倦子二周鼎字耳黃康熙乙卯舉人家漢

見文苑

胡右寅字伯時少孤有至性母有不豫色長跪移晷至老

不少衰

徐昱字耘中諸生父振歷以好施致貧昱勤苦孝養父病

顛天割股及歿哀毀幾死母患瘧晝夜侍躬滌垢穢一

日走延醫墮水中聞神呼孝子即出水負土築墳十指

俱裂撫兄子踰于巳子年七十餘無病端坐逝以上平湖朱志

沈之銳字鈞奏父貢生起雷卒于徐溝訃至大慟踊身欲

飛竟入水救起遂病癡父柩歸病少間泣曰母在未從

父地下母病不解帶者七十日母亡號哭失聲仆地血

淚殷衣左目失明曰吾得侍父母矣勺水不入口旬日

卒吳志

屈希平字又原諸生父卒喪葬盡禮廬墓三年母卒亦如

之周恤族黨水旱出粟賑濟冬月施襦死不殮者施槥

事聞奉 旌平湖朱志

陸瀟原明江西提學副使錫明嗣子事嗣母吳本生母沈

備極孝養孫輝吉字兆枚諸生亦以孝友稱吳志

陸若采字亮虞都御史清原子痛父殉節終身不與宴會

從祖某負人債無以償采割己產代償平湖朱志

周心峻字介于居圓泖濱敦厚好善鄉里皆稱長者平湖朱志

沈中秀字穎生崇禎庚辰歲饑有佃將鬻婦償其租止之

令弗償舉鄉飲

吳光室字季宣宋進士俯後從孫宗道僅三齡撫之成婚

乃返其橐好製藥施病者又集古人格言刊修福正詮

一書陳繼儒為之序

陸徵誠字心葵少孤事母克盡心力家極貧非義一介不

取不苟言笑雖盛暑不去冠幘手輯先正格言若干卷

以上平湖朱志

王棟字既昌監生少喪母呼搶號泣父病躬親湯藥衣不

解帶者彌月日禱神前願以身代及歿哀毀幾死盡力

殯葬廬墓三載善事繼母母愛之如已出與弟穉不析

爨事聞奉 旌

張友德字淡中貢生事親色愛靡間親卒哀毀骨立廬墓

三載有木成連理每遇諱日號泣仲兄出嗣以本生產

業讓之子姓貧乏者曰是我先人所遺也周之以子逢

年 贈知府以上浙江通志

許默字鳴一諸生妻亡買妾妾入門背泣詢知已嫁因夫

負債鬻之遂呼其人攜歸不索金默與趙璜皆工詩邵

延齡為刑當湖兩山人稿平湖張志

顧明傑字越萬諸生割股療母病事兄恭詩有漁山子集

祖可達父大宗皆以孝友稱

沈日芳字元贊諸生幼喪父事母晨夕不離左右

金燈鄉黨稱善人子京望字達庵太學生首捐貲葺文廟

王獨建石梁二有友無力營葬割產贈之以上平湖朱志

陸圻字近虞諸生年十五喪父母率弟四人力學皆成諸

生從父士炎歿于京師從母滯山左圻扶柩奉從母歸

死葬生養為諸從弟婚而已不娶吳志

胡光銓字以鈐監生幼喪父母哀毀如成人既葬且則歸

侍祖母晚奔宿墓下彌月不聞捐祭田為合族倡從父

卒遺子女悉心教養其產歲入為置田既婚嫁并所羨

籍授之子紹高見下紹安別有傳

楊林字漢林嘗建東湖木橋七所又濬城河自東水門至

馬家灣縣有匠班錢糧遺累其子孫康熙丁丑林請之

上官將全浙所科徵者悉併入條鞭華亭大司農王日

藻採入編年遺事題其瑩旁小庵曰餘慶以上平湖高志

張崢字如岡諸生九歲居父喪晝夜號泣母歿擗踊投地

絕而復甦族黨以緩急告傾橐應之歲稔出米數百石

設粥以賑復施藥療疫全活無算浙江通志

盧聖瞻字上史貢生督學許豸獎其孝友平湖張志

顧人龍字雲馭父患疽吮之而愈弟在縲縲破產營救得

釋以貢訓導太平教士有程年九十舉鄉飲子涵字眉

峰諸生亦孝友吳志

曹鳴灼字臻筴貢生為人重本行見善惟恐不及與陸清

獻交最契年九十舉鄉飲子宗桂孫煥謀諸生歲饑棄

產捐賑亦能讀清獻書學使王國棟以賢良方正薦以

母老不赴平湖高志參 平湖張志

沈嶠字松亭九歲祖貴楨垂歿戒之曰我遭族黨毀不得

葬父旁汝識之嶠日夜翼成祖志族鑒其誠卒得耐葬

每掃墓悲哭不已家極貧歲祲凍餓一介不取與宗人

璜相砥厲教其子黼熊先器識後文藝吳志

吳光遠字邇修敦孝弟嗜古文詞早卒弟廷遠字覲宣撫

育其孤吳志參平 湖高志

何元璜字嶽高幼喪母事父及繼母得其歡父歿孝養祖

母敦行以古人自期治喪不用浮屠平湖張志

程伯鐫字遷于家貧負米供親父歿哀毀喘息幾不續母

喪一如之兄被寇掠訪求之止存一子相持慟哭救之

歸庶弟二人遭兵流離亦親往覓歸皆為成婚事庶母

如母後家漸饒周恤族黨不倦

浙江通志
參吳志

屈希完字天若諸生少孤孝母友愛弟營父祖葬死冰雪

中復甦子朝陞孫應麟皆諸生

吳志

陸其燧字晚春貢生仲弟早卒撫其孤以宅讓之人以緩

急告者必應潘紫翰卒無嗣其燧為之葬并舉其家未

舉喪歲饑施粥報本塔院全活甚眾以仲子鳳岐 贈

州同知鳳岐字武山好施予捐社穀六百石以子鉞

贈知府

浙江通志參
平湖張志

陸光曙字東白事母孝與弟異居母或至弟所早晚定省

風雨無間讀書竟日危坐無惰容行于市未嘗傍睨偶

登舟即發篋諷誦不輟姚之揆字東衡好學飭躬制義

為世模楷與光曙皆數奇不偶並以諸生老學者稱二

東先生

平湖高志參
平湖張志

倪兆嘉字允康早喪父母竭力喪葬姊貧為其子婚娶戚

黨緩急告必應或負三百餘金不責償子觀光載光用

光觀光見下

馬汝夔字虞言邑庠生幼失怙事母至孝乾隆壬午秋母

大病焚疏籲天徹夜拜禱閱兩月不倦母病竟愈卒享

大耄撫幼弟友愛甚篤

當湖人
文逸

屈天成字培齋監生候選州同知歲大饑出穀千石平糶
為粥于路以食餓者病則與之藥全活甚眾嘗與兄大
成共置義冢歲施棺若干自縣治至新倉鎮建石梁十
有八所學宮圯獨葺之復捐田儲為歲修察族之貧困
者按節周恤以子樹榮 贈刑部員外郎 以上平
湖張志

馮洪復諸生宗族咸稱其孝友姪願字君可有品行舉鄉
飲 吳志

胡紹高字聞衣武清知縣紹安弟紹安卒于官傾資產助
完官帑撫兄子讀書成立紹高以進士任貴筑知縣革
除苛派丁外艱歸又遭母喪廬墓涕泣尋卒 平湖
高志

馮洪行字士用幼喪父母哀毀骨立祭祀克誠事長兄如
父

顧蛟字飛淵事親先意承志兄弟四人析產獨取瘠者嘗
于舟中拾遺金中路覺之反棹還其主

周日芳字蘭生監生好義有膽識康熙初奉檄丈量條議
弓口照舊又陳白糧改折之弊 以上
吳志

陶有生字西音諸生孝友好施設粥賑饑舉鄉飲子傑能
繼父志 平湖
張志

馮耀嵩字周贊諸生篤友愛凡喪葬大事獨以身任 吳志
戈定字長發諸生好任恤親族無告者膳之死無歸者殯

之夏帳冬衣推解不吝于戈溪北置義冢

楊大琮字紹春幼喪母繼母卧病久籲天願以身代卒一

慟幾絕遂得疾鄰火家人悉竄大琮撫棺號泣誓俱焚

火及屋旋息

以上平湖張志

孫培嘉字孚吉諸生遊太學崑山徐乾學器之事本生父

嗣父皆得其歡喪葬盡禮不欲私嗣產以周親黨貧乏

吳志

趙廷棻字我師諸生少孤孝事母友愛姊弟工文章通音

律騎射

平湖張志

馮煇字瑞駢諸生性肫篤曲盡孝道與人接謙抑自下無

世俗好妻早卒不再娶

陸斌字柴庵考授縣尹孝謹誠篤撫幼弟如子著有廉湖

散稿

陸士煊字礪三幼有至性痛母早歿終身不赴讌會初作

詩愛孟東野既棄去肆力經學有大易輯注三禮疑義

月令辨諸書

以上吳志

徐銘字常吉以諸生入成均父病籲天請代及卒哀不欲

生以母在強起廬墓終身事兄如父後喪母哀毀卒子

宗泰精醫施藥

平湖張志

馬燦曾字用光以貢授開化訓導事親曲盡孝養弟爓曾

貧病燥曾友愛篤至子佐堯字靜先以副榜教諭龍泉
課諸生放白鹿洞遺法父母卒年已七十哀啼如嬰兒
捐田修築祖塋創祭祀規約

倪亮采字道躬諸生父洵徵以應鄉試卒于途亮采年十
二號泣扶柩見者垂涕事母盡孝祖塋諸生喜周急亮
采克承其志捐金息族黨爭產助不能婚者撫從子與
已子均分田宅子廷鳳諸生孫藻垣舉人

倪喆林字幼貞監生父淑則受業同里陸清獻喆林篤學
勵行校訂清獻大全小學諸書鏤板行世東湖水勢湍
急陸楊橋為西南要衝捐資千餘金改建石梁行者賴

之

張長明字朗辰諸生設義塾訓其鄉之子弟建石梁以便
病涉者歲饑煮粥濟人賑活二千餘戶

以上平湖高志

沈瑜字倬宸諸生家不饒而濟人困不倦知縣董天眷倡
議育嬰經制未備歲所收遺嬰就育于蘇州瑜借朱弓
錫周維翰過鰲首捐以勸瑜復擘畫置田二百畝後張
逢年以育嬰地窄創建堂宇又捐產以備不足弓錫字
彤一維翰字翼皇監生鰲字奕昭諸生逢年字炳文監
生候選知府著有懷永堂詩存

平湖高志參平湖張志

陸嫌昌字赤城事父先意承志親族貧者不待告周之晚

以貢授松陽訓導未就卒

吳志

陸名世字松友諸生年三十婦歿屏婢媵終身不再娶子

瑩字端明諸生早喪母慟不欲生事父怡怡色養數十

年如一日孫養正字聖修諸生年十九倡戒淫會偕同

志于月朔設冊書名注明無犯焚神前歷久不怠

平湖高志

馮壇字穉登康熙丁酉舉人少孤事母至孝家貧授徒供

甘旨持身狷謹足蹟不至公府

平湖張志

王瑞林負販養親母病割股以療父病復將割股或謂年

邁非割股可救曷嘗糞糞苦則生乃嘗之甘慟哭親歿

適歲祲倪進士見龍憐而助之後倪作令註誤徵及家

屬瑞林代訊或謂之曰吾以報葬親大德雖死不怨繫
獄數載乃得歸年八十餘卒

楊豫源字升恒巨源字以潮皆諸生豫源割肱療母疾中

年喪耦不再娶巨源營葬父母及世父盡禮故人陸聖

修早卒教養其孤成立程白川卒京邸分束脩恤其家

巨源子敬直字義方居父喪哀毀卒

沈源湟字殿榮鍾蕃子少失恃事父至孝兄喪耦資兄續

娶者再恤戚族廢孤子嘉梅字裕芳監生父傷足每扶

抱如廁後患中風扶掖起卧不怠葺橋梁掩骼倡平糶

償逋糧助兩世未葬者子廷烜登仕版諄諄以清勤愛

嘉興府志 卷五十一
民爲訓

韓廷芳字遇宸諸生初成婚母以婦有宿疾欲爲置妾廷芳勸止之終身不貳色好獎人善人有過必規遇橫逆不校歲饑謁縣令陳民疾苦得緩徵晚偕楊之淳馮朝棟等舉同善會孤寡廢疾賴之

馮朝棟字覲王諸生析產後兄不給割產贍之與同里馬啟後歲瘞無主棺骸又爲放生會束脩所入悉惠貧乏屢空不愠

張漢年字蒼亭監生候選通判負才尚義海甯築塘將於乍浦採石漢年謁參將柳進忠曰乍浦九山不但保障

一縣實嘉興之扞衛石不可去進忠爲白巡撫事得已馬煊曾字又昕幼孤哀毀逾成人長勤學砥行兄熠人北闈無資鬻田以助煊領順天鄉薦成進士煊曾授徒自給子邃堂字子深有操尙事親愉愉色養父子年皆九十孫恒錫見文苑

馮錡字爾調父增候選州同知卒大同幕錡奔訃一慟幾絕三日勺水不入口雲中稱馮孝子扶櫬歸徒步走數千里遇崎嶇必號泣扶挽夜露宿柩旁旣歸葬一慟而絕事聞奉旌

徐鈺字寶籙舉人兄弟八人友愛無間年五十領鄉薦讀

嘉興府志 卷五十九
書期心得實踐人有急周之無德色有鬻女者詢知家
世焚券令攜歸以子鴻昇 贈知縣

楊紹裘字翼王性孝友持躬端毅寡言笑不苟取與淹貫
經史遵宋儒著有易義管窺性理闡義

朱鏐讀書砥行以孝友稱子汝謚克承父志有從子營父
葬不得以已所卜吉地予之年八十舉鄉飲孫子和字
介堂舉人居父喪哀毀卒

顧遐齡字符嵩監生歲饑傾囊助賑嘗拾遺金俟其人還
之

周璣字在庭性好善嘗有偷兒入其室見之以貧苦告遺
之錢其人慙感改行子錫龍見下

屠楷字幹園幼孤母有不豫卽長跪作嬰兒態母歡乃已
撫諸弟妹拮据婚嫁

馮承烈字孝移諸生孝友好施與謹言慎行日書所作事
于冊曰質心集朔旦卽神前焚之終身布衣疏食授徒
講學不倦著有左氏論說周禮論說若干篇

孫文海字叔沛監生弟觀海早卒撫其孤設家塾教戚黨
之無力從師者

陳統源字見山力學砥行歲祲周恤窮民戚友盧生甫卒
于官爲經紀其喪葬以孫嗣龍 贈翰林侍讀

嘉興府志 卷五十一
陳永祺字體仁諸生性寬厚喜怒不形授徒先器識戒浮
桃好陳說前輩懿行疊疊忘倦聽者每爲興起以孫朗

贈撫州知府

以上平湖張志

馬拱垣字翼乾諸生親歿終身茹素戚族以緩急告無弗

應嗜學著有尚書集粹

平湖高志

徐凝字鞏藩監生父卒肖像事之如生藏書數千卷至耄
研究弗輟歲祲設粥賑饑倡捐葺學宮子上法字乾庵

舉人以孫維垣

贈福甯知府

平湖張志

沈修齡字遐庵諸生工詩古文辭家故饒以好施予至饘

粥不給恬然安之

平湖高志

朱兆鵬字萊峰貢生孝友好義治喪不用浮屠與人交禮
讓不衰中年妻歿不再娶故交程白川卒于京邸歸其
櫬撫其孤成立家貧取與必嚴手訂先儒格言數十卷
子堯佐字襄哉諸生居貧守介

馮堪字景曾監生幼孤母患風疾十餘年侍奉衣不解帶
無間寒暑母歿喪祭盡哀敬遇侮不校族之貧者周恤
不怠子四長錕別見次鑄諸生事父孝養備至

屈大成字集齋貢生候選州同知少孤事母孝家素封崇
儉約尊師尚友門無雜賓及接人甚和雖童稚微賤未
嘗有傲忽與弟天成行義相助至老不懈以子學海

嘉興府志 卷五十九
封大理評事

沈發字慎齋諸生父元洲字宗環能詩工書早卒發生纔
十月及長母親授章句每讀父書輒相對涕泣母歿屏
酒肉三年家貧盡鬻婦奩產葬三世及諸父戚黨告急
雖空乏必應自奉儉約不苟取以子初 封禮部侍郎
馬鏜字應旗舉人居父喪哀毀骨立後北上卒旅次弟鏞
竭力歸櫬營葬事寡嫂甚謹撫從子女婚嫁如已出食
貧勵志終其身

陸載周字存六父奇勳爲叔父霽勳後遺產爲族人侵蝕
載周拮据營葬曾祖以下及本生父母迎養生母爲諸
從子女治婚嫁宗媼貧困無告者竭力扶助交遊以緩
急告應之無吝色

周錫龍字覲揚以舉人授穀城知縣調襄陽罷歸貧如故
竭力奉親親歿哀毀卒于喪次

沈鼎字王才少孤事母不離左右母卒寢枕苦卣三年不
櫛沐襲溼氣成瘡髮半脫落生平好周恤貧困事從父
虢甚謹貧割產以養

張應壽字玉溪諸生後伯父事所後母定省無間復遠祖
墓域賑族之貧者

沈堯字辛公貢生居喪哀毀拮据營葬四世撫孤姪成立

妻早卒不再娶弟廣字棗洲諸生事繼祖母繼母竭力承歡授徒以道義相勗族黨有所爭每就質以解

陸鏞字宮聲諸生孝友篤實接人和不見愠色與韓廷芳馮朝棟等創舉同善會

沈廷牧字岳儕諸生幼孤事母至孝家貧刻苦營葬兩世又葬外父母持身正直族黨咸敬畏先世祭田幾廢力

爭得不墜以上平湖朱志

王允猷字二嘉諸生好讀書家本富被海寇劫掠食不繼誦讀自若性方嚴不苟言笑里黨咸敬憚之當湖人文逸

倪覲光字又文孝友睦族與人接益然如春以拔貢除於

潛教諭薰陶砥礪士習為一變

陳鼎鎔字幼陶諸生習醫濟人族有遺孤無所依割宅與居撫教成立

鄭時乘字起田監生生平不苟然諾好施與里有同善會賑恤不足輒捐給之嘗傲袁了凡遺意設功過格以自檢學使者王杰以敦行不怠表旌其廬

何大齡字鼎揆候選州同知砥行好施擲置祭田宗族無力讀書及不能婚葬者皆助之嘗買林某田後某親歿無厝地焚券還其田歲暮輒躬至閭巷察貧甚者投以銀錢又遍給獄囚衣食嗣子異廷璜孫濬皆能承其志

大齡歿廷璜哀毀二旬卒

陳嘉績字丕文監生父客死嘉績竭力扶襯歸營葬不以謀兄弟母患疽吮之得愈伯兄早世撫其女爲之嫁弟嘉德以友負債二千金坐累繫獄嘉績鬻己產納之嘉德歿又撫其孤

胡沆字兩瞻諸生幼喪父母育于舅氏及長授徒爲活痛不及事親遇時祭必哀泣兄本微歿拮据營葬養寡嫂撫其孤治婚嫁宗族貧不能自存者收養之生平篤行不怠作省身箴自警卒年八十五

金昌緒字蔭臺由監生任福建布政使都事清操自勵或

至午炊不繼喜爲詩好施與遇貧士輒解囊以贈

丁廷鑒字浩如諸生幼從祖母居魏塘陳氏有婢夜奔拒之攻苦力學爲文章磊落有奇氣後歸里極貧一介不苟取

鮑振宗字玉齋諸生孝義能文章歲大稔謁縣令條陳便民事經理育嬰堂剔除侵蠹得普實惠

黃密字公謹乍浦人窮經守禮法嘗歎近世三年喪無復有行其實者早喪父母逢諱日必素衣冠涕泣終日妻歿被服飲食一遵杖期制人迂之不顧乍浦五方雜處習尚浮夸密獨矜飭矯厲末俗

潘宗敬字誠孚諸生幼孤善事母家貧客他方寤寐中時呼母淚痕漬枕席墓田失守傾家產贖歸為師營葬兩喪

劉遐齡字伯朝少孤母馮口授章句教以行善遐齡識之不忘倡議捐復宗祠恤孤寡有鬻婢者詢知舊族焚券歸之

張廷誦字穆如諸生博通經史屢困場屋屏居課子崇實行師嚴錫光卒遺孫金絨無所歸收養教誨成諸生為婚娶割宅與居金絨卒復恤其嫠病革猶囑子若孫善視之子宗濂諸生

何廷鏞字東江貢生性孝友通達事理里人陸培知東流縣以廷鏞人品薦引

見命往陝西試用以親老辭

屈維銘字竹書監生刲肱愈父疾施燦字履元諸生父母病刲肱和藥以進俱瘳

孫國桂字顏卓監生好施與有以緩急告者必竭力以應家以是中落無所愠

孫柏曾字永清諸生事所嗣父本生父孝待羣從兄弟友愛性剛毅不隨俗病革戒家人勿用浮屠製絮衣百領惠無衣者以上平湖張志

顧祖履字乃成讀書尚實學設家塾以教子姓葬族之不
能葬者中年鰥不更娶三舉鄉飲以子天挺 贈文林

郎天挺別見

伊志

卜源字蒼文諸生原籍秀水父寅中生子三伯季皆不善
治生產父嘗以為憂父卒既葬源悉以田廬讓兄弟奉
母曹遷平湖投徒奉養曲盡孝道雍正六年

詔舉孝友盧生甫欲以源薦力辭一日無疾卒

伊志

許焜字培風諸生與從父梁同捐義田贍族歲禮煮粥賑

饑又建青蓮社倉倡捐粟備荒衣帳櫝積施無虛日

伊志

張世昌字振西監生八歲喪母盡哀與弟世仁友愛事繼

母孝母病鄰火及寢世昌昌火負母出母尋卒世昌方

病卧一慟幾絕自是朝夕侍父側父病衣不解帶四閱

月父病愈世昌卒事聞奉

旌伊志

馬永清張斗坊民天性純孝家貧賣菽乳養母惟所欲母

卒哀毀骨立朝夕奠勸侑如生時繼以孺子泣及葬露

宿原野不避雨雪里人稱馬孝子

伊志

錢大登字惠寰乾隆癸酉舉人事親孝律已以恭雖盛暑

不去衣冠家貧授徒未嘗一千有司晚選瀆安教諭以

疾不赴戈宏地字厚齋監生性孝友兄宏圻宏載並早

卒遺子女撫之成立嫁娶又收育寡姊遺孤歲祔大登

與宏地捐賑知府李星耀給額表其閭伊志

沈炳字彪堂候選按察司經歷早喪母無兄弟父卧病侍

奉歷三十年不怠有鄰女既字夫遠客母食不給欲改

字周之全其節戚屬某屋圯與之屋死為之殯又舉親

族八棺歲饑倡賑建石橋三伊志

邵涑字玉方布衣性孝友澹泊寡營尤遠涵養卑幼有不

率訓者惟引喻之使自愧里黨重之于志

屈世楣字彤軒學洙子貢生候補主事少孤事祖大成能

得其歡心撫從子如己子宗黨貧者月給以米死則喪

葬之倡捐葺學宮建瀛洲書院及育嬰堂同善會以子

為鼎 贈刑部郎中伊志

王鑑字硯畚耒陽縣典史乾隆六十年辰州苗亂鑑以督

糧勞卒嘉慶元年

賜祭葬伊志

陸光濂字景周監生由四庫館補黎平府經歷署黃平州

事值苗寇南籠奉檄守安順府地多叢篁密箐無城寨

光濂率數十卒支拒浹旬賊猝至光濂出禦被數創度

不支擲鎗付僕曰我死此盡職耳躍馬墜崖死事聞

賜祭葬襲雲騎尉三世恩騎尉世襲伊志

金廷勳字枚臣由吏員補荆門州建陽司巡檢嘉慶三年

四川教匪入建陽肆掠廷勳率鄉勇殺二賊賊退追至
閩家灣中伏力竭死事聞奉

旨加等議卹襲雲騎尉三世恩騎尉世職伊志

屈樹榮字敦吉由貢生議敘補刑部陝西司員外郎以病

乞歸父禹功好善樂施子樹榮事父孝凡捐賑平糶惠

族卹鄰置學田義冢諸善事皆克承父志云伊志

陸鴻飛字振雲監生幼孤事母徐垂三十年孺慕不衰弟

鴻昇沒遺孤甫週晬割已腴產養育之乾隆乙巳夏旱

王倡捐施樁殮貧死者平湖路志

屈宏基字開務庠生天性純篤侍母病不解帶新安墨質

久病逆旅昇至家衣食之給資以歸賣珠嫗失珠將赴

水出白金代償之故人某以繼嗣不肖持兩篋相贈卒

歸之旋舉鄉飲大賓子維鑒樂善好施有父風平湖路志

倪耀曾字鳳超號雲根喆林子少孤賴寡嫂馮撫育成立

馮亡耀感嫂恩用昌黎故事服期以報并以子世培後

焉至戚楊之瀆貧老無子館穀終其身善畫蘭鼓琴母

錢八十餘歿方病劇不能視含斂哀毀越六日亦卒平湖路志

平湖路志

高沈字蘊沖太學生侍郎士奇曾孫父岱喪偶不再娶著

有金臺小草瓶廬詩稿沈事親孝躬親厠脮仲兄澍歿

靖邊縣任往扶櫬經棧道車軸折墮深谷車敗羸斃嘔
血數升卒無恙恤兄兩孤備至工詩善繪事女瑛髫年
得其傳 平湖路志

高賜忠號小春邑增生家赤貧筆耕供菽水事雙親盡其
歡課幼弟成立友愛無間言弟賜孝號萊堂舉人孝弟
性成兄歿後撫猶子若已出居恒踐履篤誠均足為邑
人士矜式 新纂

王思高字繼先家貧溷跡掾吏修飭內行同產十人咸友
愛尤虔事伯兄遇督責雖老必俯聽嗜書史醉輒傾倒
所蓄性不諧俗人迂之勿顧也時挈子大經謁陸清獻

祠端蒙養比長令游方垆門講求讀書為已之要詒謀
盡善惜未食報遽歿 顧廣譽撰墓志

伊秋字耀文性至孝嘉慶己巳鄰有喪焚紙錢餘火橫飛
延及母居於烈焰中負母登屋鄰舍與布縋母下已亦
攀援得免觸鬱攸旋病卒 抱璞亭文集纂

朱紹基居舊衙業蘆瀝場界書鄰朱失火半夜聞呼聲急
披衣至父卧所負之出回視火由曲突起烟焰滿屋未
俱焚人稱孝感 當湖外志

吳元凱字杜卿二品蔭生璫子生母周氏早卒母錢氏撫
之成立母素瞻弱雷雨之夕輒侍側不去母病劇虔奉

湯藥衣不解帶者累月坐是得咯血疾母亡哀毀咯血
益甚旋卒距錢氏之歿纔十日嘉慶十五年 旌

方樹業字載旂乾隆癸卯副貢出嗣其叔父孝事母劉氏
及本生母陸氏年十四劉病篤樹業禱神兩月無虛夕
病霍然愈而樹業已兩鬢華耳重聽矣及卒號慟淚爲
之枯卒年六十三嘉慶二十四年 旌

陸汝灝性至孝祖母父母卒值冬月營葬積雪厚數尺汝
灝身率傭人輦土手裂出血漬麻衣皆紅旁人爲之感
泣嘉慶二十五年 旌

張慶盛字嵩三嘉慶戊午舉人性至孝父病侍湯藥不解
帶不交睫者累月後侍母疾母素不信醫慶盛禱神請
以身代首頓地額爲之腫居父母喪日夜哀號鄰里聞
之皆爲流涕後仕至深州知州道光十四年 旌

費振麟字西仁增生四齡失怙事母孝年已艾晨昏隨侍
不改孺子色生平但取脩脯供甘旨絕不與戶外事

張鳳池字福謙父病刲肱以進遂瘳親沒廬墓人稱其孝
張咏莪字蓼天副貢生力學敦行事大父及父甚謹父卒
奉繼母怡怡色養母歿時年已艾猶孺子泣與從弟同
居終身無間言

張炯字詠賢廩生性至孝母沒痛哭嘔血絕而復蘇者再

嘉興府志 卷五十九
父病篤嘗割肱以進友愛兩弟終身不析箸好讀書寒暑鈔撮不倦

朱勳字汝諧事大父及父母俱盡孝友于厥弟性和平言動不苟鄉里敬之

陸朱雲字雲駿夢求子事父母孝自幼能先意承志爲里黨所稱父疾革時割其臂和藥以進創過深數月亦歿年二十四

周師曾事母孝母病割股和藥以進母竟不起越二年師曾亦卒

徐天貴生有至性父爲水師營百長嘉慶初巡哨出洋遇蔡匪黨傷刃而亡天貴因求入營從帥巡緝遂得父骸骨歸事母至孝母歿後不數年亦死

張光獻字雲標天性孝友鄰人不戒于火延及光獻居急掖其病父出火勢彌熾復從烈燄中翼祖母俱出然已傷于火遂得咯血證嗣因母病不解衣帶者三十餘日疾愈劇母卒一慟而絕年僅三十七歲

黃欽阿字鳳威廩生以能文名性至孝事繼母能得其歡心幼患瘍跛其左足終身不娶著有端溪硯史

張人標字琴堂附貢生博學能文少孤事母孝兄歿撫孤成立周恤貧窮無倦色兼通時務當事俱信重之著有

香草齋集

袁步先字東嶠嘉慶戊午舉人署甘肅金縣纔四十日丁母憂以哀毀卒著有循陔草弟路先甲子副貢事母孝有日香居吟草

陳大來字南英性廉直有金某業墮負人錢五萬方欲自經大來救之詢其故代為籌償兄沒撫姪倍致其愛卒年九十一

胡大業字廓園有奴幼自鬻長思去大業即還其券歲祿來依仍善遇之復給貲使歸謀生理邑有善事如經理育嬰堂濬城河皆任其勞子光庭字匪莪早失母恒背

父啜泣父沒朝夕哭無時宋某貧甚將鬻妻力阻之令傭于家其好施類如此

張可大字敬安附貢生博學能文父執胡馬璉宰高明卒官無子出貲託人扶襯旋里并為營葬司同善會事清釐積弊

戈宏地字厚齋性孝友好施予歲大祿出貲賑饑為巨室倡其他任恤之事無不盡力里黨咸稱長厚云

許昌城字鶴羣樂善不倦歲饑嘗捐米數十石分給鄰里貧戶且為煮粥賑饑又嘗捐田葬族黨之貧者里人咸德之

倪之槐字中黃庠生沈潛好學尤樂于爲善嘗偕族人共建橋梁又設立渡船遠近賴之

陶宗揚字光欽例貢生好義樂施主育嬰堂事時歲歉嬰多堂無餘畜宗揚盡心經理越三載捐貲至四百五十餘緡全活無算

張誠字斯立爲人慷慨好義戚族以緩急告無不應者又以當湖書院缺經費捐田一百七十餘畝爲諸生膏火資卒年止二十

鮑東璿字秉謙諸生振宗子勇于爲善經理育嬰堂克盡心力又嘗偕同事十人舉行永安會收葬士族之貧不

克葬者東璿總其事永安局之設自此始子念祖字師前亦諸生著有音學入門

黃鳳字停雲樂善好施嘗集同志修文廟復放生湖創永安局以賑貧乏建普濟堂以養老設思源書塾以課貧家子弟計前後捐貲不下萬金鳳自著有當湖五事紀畧道光三年

欽褒尙義

盛翰文字建章性好施遇歲歉踴躍赴義嘗偕同人立廣仁堂購隙地七十畝有奇爲義冢又分局于全公坊施樽濟乏復募捐義會五千金爲經久計此其善舉之尤

著者

徐夢熊字漢雲廩生先世以醫聞夢熊傳其學貧者就診每助藥餌費性疎財任善舉不遺餘力母性畏雷嘗授徒某家每雷雨輒歸侍左右工詩文著有漱芳閣遺藁

以上皆于志

陸雲駿七歲喪母哀毀如成人父出外恒枵腹以俟父病刲臂進得瘳嘗力疾手書孝經十八章以見志卒年僅二十四武康徐熊飛為作傳漱芳閣集纂

周三酒徒為市中任負脚夫兄弟各戀妻子不顧養老母三隻身力役供給奉母外餘錢付酒家買醉歌呼以博

母歡晨昏必定省雖儒者不及母歿尋醉死

當湖外志

朱士坊字嘉言精岐黃術性至孝嘉慶壬戌正月鄰不戒於火雙親俱酣眠急負父從樓窗躍下復於烈燄中負母由傍戶出俱無恙火亦旋熄兒時定姻梅氏越一載氏歿誓不復娶咸豐年題旌木雜書屋文纂

周克敏字慎行監生建宗祠置祀田道光癸未己酉邑兩遭水捐貲助賑衣藥掩埋靡善不為

木雜書屋文纂

陳佩蓮號雲溪輕財好義道光壬寅乍浦陷毀家紓難兼辦善後事宜議敘知府賞戴藍翎己酉水灾倡捐賑濟平湖萬程橋將圯侍郎徐士芬議脩未成而卒

續募竣工新纂

何晉松字茂承國學生為季父爾明後事母吳暨嗣母葉周旋色養無纖毫異幼習業乍川藥肆父方適客授病日必晨省舐以舌始歸供厥職比長服賈雲間同業袁某臨歿寄孥雖避寇必挈以俱少失學唯四子書童習能記憶終身虔誦之崇尚節義尤天性少成顧廣譽悔過齋文集

袁景忻字昱初少孤習賈於禾遂家焉兄金燧慕游江西客死挈兄子丙昇扶櫬歸獨任喪葬并以夙受嗣產田宅畀之自甘貧窶不以介懷自粵匪陷郡城閣門死之

同治四年得

旌如例新纂

汪惠卿佚其名兄弟四人獨惠卿善事其後母咸豐辛酉秋兄弟奉母避賊沙灘賊至母曰四子同死無益急避之惠卿使弟輩挈妻妹去我家子義當養母生死共之八月被擄賊以重聽縱之歸仍侍母側明日往田間拾菽供母食至晚不歸往視之右肩下多槍瘢褻衣有七孔焉母至今猶藏之云新纂

陸武曾好賭博剛不為人下邑城陷土寇蜂起世家子某集團防鄉里招武曾共事後眾潰武曾走海濱世家子為偽官所得作書招武曾給以再集團練武曾歸知為所賣匿不出已蹤跡得之世家子以降愆惠武曾怒曰

官人可降我陸武曾不能屈也乃殺於新倉東市其友

吳某竊尸瘞焉

新纂

李五觀佚其名率百夫戰賊於新倉既敗五觀與其友殿
為賊縛去支解之鎮人賴五觀一戰遏賊勢得盡逃死

死者五觀與友僅兩人焉

新纂

錢耀字霞生監生工花卉求畫者盈門咸豐庚申七月十
五日城陷賊至其家迫之降不從以槍刺其胸立死妻
高氏大罵賊賊斫之越三日死從女大寶亦斫死明日
賊又至耀嫂俞氏及從子寶瑚寶瑚妻朱氏從孫女三
大寶皆赴水死從孫大觀生纔七月俞氏抱之赴水浮

而不沈賊去猶呱呱泣人取而哺之卒以無乳死耀嫂

丁氏挈婢阿彩走賊執之丁被數刃月餘死賊欲汙阿

彩阿彩奮拳擊賊賊大怒磔之一門之中十人殉節平

邑忠義當首推錢氏焉事聞卹贈雲騎尉世職

新纂

黃鎔字子鶴歲貢生成豐庚申賊至索金鎔譌云在樓上

賊釋之鎔即躍入河賊以篙攢之卒

新纂

周家溱號雲樵歲貢生潔身自好後學矜式同治壬戌避
地南牛場有友某來訪言論間已為賊黨所惑家溱面
折之是夏死於獨山之麓妻及二子俱餓死卹贈雲騎

尉世職

新纂

鄭之僑字喁齋邑廩生內介外和嘗著課餘自省二卷咸

豐辛酉遇賊全公亭脅降不屈賊怒割其耳月餘死卹

贈雲騎尉世職

新纂

戴鑾字湘帆監生生子五人咸豐辛酉賊踞新倉一子已

前死三子死於賊次子庠生寅清復被擄鑾孑然一身

飢寒交迫或勸往賊卡鑾怒曰我甘餓死決不依賊為

活也時偽官某其鄰也招之掉首不顧後竟餓死

新纂

張憲瑾號蘭畦監生同治壬戌秋周圩踞賊遁憲瑾日望

官軍來俄聞槍聲以為官軍也喜極出視則賊已至前

執而索金旋斫之死子桂星年十二哀毀如成人不數

日卒

新纂

徐某以縫衣為業事母孝母病危甚割臂肉進病立愈閱

數年又病復如之庚申城陷負母自賊中出崎嶇兵間

方賊至時積財兩甕以一甕給兄兄賴以濟同治元年

餓死

新纂

王子馨刑房吏也不取一非義錢恂恂如儒者居湫隘雖

炎暑深居扃戶不至門前納涼陸清獻令嘉定招入幕

此掾吏中傑出者

當湖外志

徐鼎基字燮齋號梅伯佛山同知應照長子性孝謹能自

刻苦幼隨父任處事即如成人援例捐同知以父年高

不仕粵逆平襄辦善後任勞怨業素豐遭兵劫後不惜
毀家於捐修文廟諸舉獨能率弟姪輩為之倡顧持大
體以勞瘁卒年五十八

新纂

文苑

明

陳昌字穎昌景泰間諸生與同里沈琮兄弟善工詩有菊
莊集才思藻麗長於七言沈季友云郡自清江翼隱後
風雅衰落四陳三李之餘無聞焉至正統天順間始盛
如菊莊外嘉興有姚穀庵海鹽有張方洲嘉善有周桐
邨皆卓然成家惜菊莊集不得僅于橋李英華見如千
首已足俯視流輩

平湖朱志參橋
李詩繫明詩綜

李璧字少白諸生有文名與茅見倉瓚輩有雲居十才子
之目後以事下獄茅力出之遺文無傳

平湖
朱志

馮敏劾字忠卿給事汝弼子貢生少善屬文七舉不第杜

門著述工詞賦筆札嘗渡江中流被風舟幾覆賦詩自

若著小有亭集三十卷子伯禎字正伯有青陽集平湖朱志

洪世基字爾濟舉人少穎悟六歲能文日閉戶讀書無他

嗜不謁官長未嘗向人言貧陸基仁字元卿監生師事

袁了凡篤學不慕榮利著有易元尚書傳鉢詩說纂元

禮記道窾春秋刪補胡傳史記寶鏡諸書平湖程志參平湖張志

沈懋孝字幼真母俞姓七月而生瘡甚膚清可見五內三

歲母卒繼母張愛之如已出以進士授編修遷南司業

中蜚語謫歸授徒為活擁書萬卷寒暑不輟為文伸紙

疾書不假思索論者謂其文神超骨秀如秋濤曉月詩

不拘繩尺以雅正為宗著露滴軒稿石林蕢草水雲編

子瑞鍾字德培為文古奧以貢知陝西雒川縣著有周

易廣簽四書贛浙江通志參平湖程志橋李詩繫

孫宏祖字令宏監生尚書植孫少負軼才與陸澄原趙韓

陸啟滋馮洪業諸生結詩社為人兀冁不為世所可文

詞多感慨幽艷獨韻自比於怨姬思婦著有樸語影語

等刻子愚公亦能詩有惜誦集平湖朱志參柘上遺詩

懷所學字敏卿萬歷己卯舉人日扃戶讀書精訓詁淡於

名利平湖程志

鮑應選字太鹿湖州長興人博學治春秋執經問業者甚

衆萬厯間館于縣馮氏因家焉以貢任松陽山陽訓導

子季方之高之元皆有文名學者稱春秋三鮑

平湖朱志

姚世靖字子清幼孤事母孝為華亭諸生受學陳海士崇

禎後息意仕進隱居教子詩秀逸有翠樾軒稿

平湖朱志參柘

上遺詩

俞懋敬字元禮有漱石集十二卷弟懋相字元簡有稿曰

酣語同族允懷字懷茲諸生受知張天如楊維斗有聲

婁東詩文集二十卷南渡野記閒齋志林東湖記聞玉

鈞小史子來章字孟公善詩為當湖七子之一

徵獻錄參平湖

朱志

王建中字維新進士累官參議乞歸日夜誦讀老而益篤

著述甚富散佚不傳

平湖朱志

王路字仲遵善蒔花居龍湫萬松臺輯花史左編二十四

卷雲間陳繼儒為作序又嘗輯古今安貧士為一編曰

冰蘖薈弟端字正始能文工詩畫中年棄舉子業學劍

習兵家言著車戰圖及城守要畧諸書明季走南都以

策上當事不見用後竟如其言疾革命以明處士表墓

有雲外集子連字蘭為諸生能詩

九山志

曹徵庸字遠生以進士歷刑部郎中出守汾州性好潔掃

地焚香避俗若浼每攜襪被葛巾芒屨自肆山水間詩
有冰雪軒稿清疏曠逸多出塵之想弟隨字是誰以諸
生入成均與孫令宏毛修之齊名有壹是山房集徵獻錄

馮元鑑字三我以舉人授合肥教諭陞涪州知州乞歸結

廬雙溪濱有雙溪詩草平湖朱志

宋咸初名斌字二完後字爾恒別號覺非讀書陳山著易
說有金陵遊草陸錫禮字中黃學易與咸齊名有讀易
微言同時有倪端字惺孩時一中字聖傳皆入李天植

王忘機社天植謂咸為勝友錫禮等為益友端父醇字中
白名著金沙文社晚年詩一歸淡遠有海濱野老集平湖

朱志參拓
上遺詩

沈澣字則新家貧隨父讀書邨塾刻苦工文屢試不遇遂
棄舉業肆力經史授徒海鹽與胡震亨姚士粦交著讀

書醒學庸蒙筏尚書印平湖朱志

陸啟法字叔度貢生博覽經史不事章句好論古今成敗
及邊塞事纏纏不窮客燕京傾橐遊宴詩宗少陵然酒
酣擊盞與會所至累牘連篇亦復不拘格律有賁趾山
房集百卷讀史四十卷經世譜八卷太元測一卷射訣

一卷馮李詩繫
參明詩綜

趙韓字退之初名京翰字右翰刑部郎中維寰子以貲入

成均與四方才士交詩雄雋兀傲刊落恒蹊晚自號欖

生著欖言蔗言徵獻錄參
橋李詩繫

吳佐字懶雲少穎異舉止不凡工書善吟以舉人授岳州

通判未幾乞歸平湖
程志

孫曾楠字讓生諸生尚書植曾孫結廬秋涇人稱鐵庵先

生雲間陳繼儒以家藏楊廉夫鐵冠鐵笛為壽曰冠貯

竹葉酒笛作梅花弄此庵大不俗矣偕妻黃月輝吟咏

其中著梅間草竹裏吟學陶集浙江通志
參徵獻錄

陸上澗字芳洲舉人少有神童之目性冲和從弟私鬻其

宅置不問國破後不出博極羣書年七十餘猶手一編

弗輟著有白雪談柄九山志參
蜃園遺文

沈樾字元懋戈思齊字子賢林中英字儲聲皆布衣工詩

思齊有垂裕堂集

馬萬方字遐卿嘗為其父上書幾中璫禍著有納庵艸馬

嘉松字曼生有花鏡雋聲北遊瑣言東湖著等集萬方

子辰御有絳雪亭集以上橋
李詩繫

國朝

馬廣幹字飛生靖江訓導鳴雷子幼警敏讀書過目成誦

為文數千言立就善談論凡理學性命之微及古今成

敗得失疏通條貫聽者忘倦著有四書讀詩文集門人

私諡端敏先生

柘上遺詩

孫之琮字元襄諸生自杭州徙居鸚鵡湖著詩論及輿地

山川圖子眉光字季歿諸生工詩文

平湖高志

馬秉恭字子近諸生性兀傲不諧俗晚居北郊集法書古

器好與劍客酒人遊或醉臥水草間與牧豎為伍著有

蒿齋集

柘上遺詩

陳國政字憲生讀書元珠寺婁東張溥雅重之順治庚子

歲貢于舍南構三非圃栽花蒔竹嘯咏其中二十年不

入城市著有陳子古業二卷詩集三卷

橋李詩繫

沈皞日字融谷以貢授來賓知縣遷知辰州歷有治績卒

官工詞為浙西六家之一有燕楚遊草柘西精舍詞

吳志

于有恒字聖初精易學天啟間以貢授四川南溪主簿子

琳字貞珉諸生少任俠喜擊劍談兵兼通堪輿醫卜諸

術書畫俱臻逸品以父好易究心謨述著有廣變象告

學古編香祖庵集

柘上遺詩

柯宏祚字魯山九歲補諸生甲申後草笠布衣遊燕南江

北與方外畸人遊著有九山草堂集

吳志參平湖張志

朱之鑑字孟昭諸生性散誕遭亂避蹟雙涇虞山間歸禿

頂緇衣授徒為活與馮秉恭周宏起善著有北牕存稿

九山續志

周宏起字雲蚪以貢生授青田訓導幼魯鈍潛心力學後

遂通貫著有易經集義望古堂集又有四書集義陸清

獻為作序謂其排斥姚江有功考亭平湖高志 參乍浦志

沈日星字明阿諸生與弟不負俱以能詩名少從父宦江

右黎元寬器重之遊金陵與吳偉業姜埰諸人為社友

著有蘭石齋詩草不負字集九性孝友初與兄析居越

旬日必艤舟往問乃復謀同居著有老雲齋集村居詩

哦石齋稿日星子甸字南城有野意齋詩集不負甸並

諸生平湖高志

陸莖字我謀諸生為人和而直朋友有過面斥不少貸好

吟咏不問家人生產著作散佚所刻有曠庵集與趙泖

陸菜沈皞日陸世栻陸來章沈隆峴稱當湖七子吳志 參構

李詩 繫

郭襄圖字皋旭貢生明御史紹儀子工詩性倜儻好交遊

乙酉泛舟入海期年歸一日殺仇于市下獄賴友人李

慶乙得脫嘗與沈季友同緝柘上遺詩著有更生集兄

雍圖順治辛卯舉人以父年老不赴公車外孫鍾機字

石城諸生博學工文學使姜櫛謂才冠浙士機弟秘楫

事兄恭俱早卒平湖朱志 參吳志 構李詩 繫

姚宏度字宗裴以貢授中書詩文超俊兼工書畫著有一

山房吟稿書畫參吳志

趙佃字天來諸生淹貫經史百家詩格近中唐性狷介疾

惡不少假不喜飲酒遇四方士燕會端坐竟席不妄發

一言有聘至粵東者抵其署即返語人曰我欲一啖荔

枝耳甯能作人幕下客耶晚獨居一室不與世接病革

索筆書所見示子類有道者著有度嶺言紅豆詞資真

集平湖朱志參
平湖張志

陸煥元字闇仲夜讀書往往達旦以舉人授廣東昌化知

縣甫到官卒吳志

陸瑋林字右韋以貢入成均知安肅縣有惠政著有拈嘯

軒偶存北征松下歸田諸稿平湖高志

沈崧字涵中貢生博極羣書耽吟咏著有長水雜詩行世

平湖高志

鮑駿字聲來諸生學于長洲汪琬琬稱其詩近劉錢施閏

章王士禎葉方藹田雯潘耒皆引以為友以博學鴻詞

薦丁憂不試晚遨遊名山有武夷天台諸題詠祖父遠

工書得二王楷法駿工草書平湖朱志參
平湖高志

牟江歷字西崑好學深于易與同里范光寅舒原馬鏜應

旂皆以博洽推重於時平湖高志

陸世來字上扶諸生僑居嘉善以能詩名與朱彝尊譚吉

璉沈岸登往來贈答築匡山讀書處于永安鄉麥隩里
以終著有陶軒集梓園詩詞稿戊子詩稿紀行草伊志

錢起隆字買山諸生工詩與閣學陸棻中書葉舒崇稱柘

湖三俊平湖張志

張家漢字漢中貢生讀書穎敏為文章浩瀚有大蘇筆勢

著有詒安堂文集族弟綦字星若工詩吳志參平湖張志

李登字安道舉人讀書明性命之學弟瑤枝字耕煙雲栽

字文海皆能文時稱三鳳吳志

陸攀字威咫貢生清獻父行清獻館倪氏校閱大全諸書

攀與參訂詩法蘇梅工書善鼓琴通岐黃家言著有易

義韻譜四書尊聞錄宏雅堂集平湖張志參

稿李詩繫

李碧幼孤能文與先輩趙無聲陸嗣端馮兼山友為人亢

爽不苟然諾著有鴻儀堂集陸谷字嬾漁有夜鴻鳴集

趙璜字道闇有兒鈔集馮元白字匏慈諸生有則鳴賸

稿沈峻字華九有棹花草張宗信字以純有素閣吟沈

乘字洪緯有匏落集詩筆皆有韻致伊志

陸士煒字昭文與弟士琰並有文名著有蕉侶遺草沈暘

字叔輪家世豪盛折節讀書為諸生不遇棄去庭列雙

松日哦詩其下非高僧韻士不納著有金庭草張璠字

峒一海門知縣孫大雅受學張侗初才氣豪邁有載石

舫集伊志

陸之瀚字水立自號白鶴山人與同里錢士馨施洪烈族人睿濬明上瀾相唱和晚年食或不繼泊如也著有鶴

山草堂集濬明字以昱博綜六籍有東園稿伊志

戴茂隆字蘿軒監生博覽工詩賦舉博學宏詞鶴徵錄

張廷璇字義傳號未堂庠生讀書過目成誦年十七喪父事母孝謹母多病博覽方書親奉湯藥尤研性理搜羅

陸清獻公著作刊刻流傳乾隆甲子知縣高國楹聘修

邑乘任分纂撰清獻傳略一篇稱為詳略得宜當湖人文逸傳

呂迪字迓康增廣生讀書刻苦早謝舉業取左氏內外傳

分類纂之系國系人自為首尾一如通鑑紀事本末之

例末附論說書成凡三十二卷名曰左國類纂藏於家

性純孝硯田所入必具甘旨父老病雖館於外間日必

歸視湯藥當湖人文逸傳

沈季友字客子西平知縣蔡子康熙丁卯副榜幼受知檢

討毛奇齡長遊太學才名為一時推重歸杜門著書搜

討文獻建宗祠撰族譜請祀李天植馬嘉禎捐資贖閩

人之鬻于旗者著學古堂集迴紅集輯賦格柘上遺詩

樵李詩繫行世浙江通志參平湖高志

張孚吉字初岳諸生為文古奧後棄去精研心性之學持

躬端整儕輩皆莊事之微言密義不輕以示人

施湛字露巖大學士鳳來曾孫少敏悟年十三補弟子員

工詩早卒有草堂初稿

以上平湖朱志

陸嗣源字若谷諸生敦倫砥行工制藝屢薦不售著據梧

詩鈔撫松文集

吳志

姚大楨字亘山諸生少穎悟善屬文不慕榮利有枕書樓

詩餘百花詩梅花百咏邵暘字白崖監生有白崖詩集

德藏寺志

吳志

楊九雲字廣庵諸生幼孤事母孝積學能文著有遜業堂

集四書心解

平湖張志

俞曾模字存三諸生家貧授徒一時名雋多出其門著有

五經講解諸子粹言周禮纂註

浙江通志

沈岸登字覃九布衣性恬淡耽泉石屢空晏如侍郎高士

奇慕其人延為子師未嘗一語干士奇士奇敬憚之工

詩詞間作山水蘭石淡遠絕塵書法二王亦工鐵筆著

有黑蝶齋詩詞春秋紀異

吳志

胡慶豫字離來貢生學問淵博性醇謹嘗緝四禮尊義以

檢身教家少工詩客江西與毘陵邵子湘漢邵彭元敘

相倡酬由京師入蜀入秦歸而詩益工著東坪詩集弟

觀字次咸康熙辛酉順天舉人丁父艱哀毀卒恒啟貞

復並諸生恒字晉三通春秋啟貞字震初究易禮能詩
客死豫章復字見亭書學北海山谷時稱胡氏五俊

張志

周儒字宋傳貢生幼慧耽經史有交翠軒集子夔字鄰臯

貢生學海字紫迴諸生皆以能文世其家張重芳能詩

有晚閒草子培元字江亭監生好書購宋元本積千卷

寢食其中有吟香詩草

平湖張志參
平湖高志

俞嶽奇字丹嶼好讀異書工詩精篆隸歷遊四方與諸名

士交所學益邃有荻雪莊詩西吁筆談衡素齋印譜陸

命時杰字耳瑩諸生少不羈長始折節讀書工詩文求者

接踵應之忘倦論史事如指掌有廣輿要覽百歲考等

書

平湖高志

潘應奎字星伯諸生負才不偶工詩蕭澹似韋左司刻苦

近孟東野洛如社中推為翹楚

平湖張志

陸大復字松澗貢生著有明人世說春雨山房集

平湖高志

于東暹字堯瞻諸生工詩詞弟東景字暘谷康熙庚子副

榜讀書寒暑不輟著述甚富有錦璇閣詩稿姚姓字生

生自金山徙平湖有修竹廬稿子廷瓚字述湘有懶迂

稿鷓水吟耄學集

平湖高志

陸競烈字懶真諸生有文名再試不售遂棄制舉肆力于

詩幽秀高潔于洛如社中別樹一幟晚忽薙髮結廬墓
傍自稱栽松道人著有停雲櫝影集

孫均諸生少負博雅名文章書畫時稱三絕

周理字建庸監生本姓李嘗遊京師不遇歸授徒講學著
有頤貞集

沈昌祚字御帆諸生負才名受學毛奇齡詩賦得六朝遺

意

以上吳志

葉之淇字右水監生候選州同知少負異才從閣學陸萊
遊著有寒碧齋集黃山遊草弟之溶字立亭學使李清
植以人品端方薦乙卯徵鴻博著有小石林集列國考

平湖高志參
平湖張志

陸載紀字抱青檢討奎勳子貢生幼好學至老不倦寢食
坐臥不離書籍遇未見者卽手錄母病不脫冠帶者兩
月母歿哀毀卒從兄載崑字伯璣諸生年十三能詩嘗
集里中士結洛如詩社歷二載得詩數千首檢討朱彝
尊爲汰六卷序刻之

平湖張志

劉錫勇字硯芬博學多識詩文不屬草自中繩尺著有待
廬集韓載錦字貽孫有寶墨齋詩鈔沈燮字御季工詩
歷遊金閭白門江右湖北黔南詩益闕肆有蓉湖詩鈔
唐起鳳字羽豐舉人有九峯詩草

平湖高志參
平湖張志

朱景濂字雙穎父炳以孝義稱景濂為詩文於鄉先生各師所長不專守一家性卞急中年與黃正色遊涵養一歸和平續修李天植九山志正色字肇修諸生踐履篤實好養生家言

平湖張志

陸天錫字畏蒼乾隆戊午舉人幼孤母林授章句長以能文名母歿哀毀得心疾奉部截取知縣不能赴旋卒生平交友以道義相切劘詩筆雄健書得晉人意致著有古香閣詩集從弟祖錫字念劬拔貢生薦舉博學鴻詞有松鮮集

平湖張志參平湖高志

陸其璋字琢良諸生孝友醇謹究心經學著有周易講意

平湖高志

褚王庭字扶九博學工文以貢授孝豐訓導不赴子如幾字陟三諸生幼治毛詩晚注易旁搜博採晨夕不輟張奕樞字掖西監生父崢歿有弟七人奕樞延師課之皆成立相友愛皆以文行稱於時奕樞三試順天不售歷遊秦粵晉楚學問益廣著有芳莊紀遊月在軒集弟應璇另有傳子鳳放諸生有泌香居稿

以上平湖張志

陸鍾英字舒霞乾隆辛酉舉人沈潛經史工詩古文辭兄汝欽罷官歿遺孤寡鍾英養撫之

高嵩字三臺編修興子監生由

武英殿行走議敘州同知補山陽管河縣丞工書法姊壻張文敏照嘗令署其款人莫能辨詩得三唐遺意曾于任所賦落葉詩三十首為時傳誦乞休歸著有簡靜齋集詩鈔

馮重華字文彪舉人性坦直不隨人是非人有善輒稱道不置有南屏稿同時張日焜老于文為諸生師子在霄攻苦績學父歿教弟鍾秀成進士

張雲錦字龍威監生工詩文舉博學宏詞著蘭玉堂集及弄珠樓佑聖宮德藏寺諸志

馬恒錫字久庭諸生詩筆峻潔不襲前人一字人品高逸

恥標榜有古直廬集

馮銀字含輝拔貢生嗜學工文屢薦不售從遊者輒掇巍科以去晚授仙居縣教諭講課不輟甫三月卒歸櫬時諸生感泣有徒步送百里外者

以上平湖張志

張景陽字開三拔貢生少孤隨諸兄讀書晝夜不輟文辭根柢經術不汲汲榮進杜門著述搜討文獻著當湖人文逸若干卷詩有小鳴齋集十二卷

伊志

馬咸字澤山布衣能詩善書畫兼精篆籀寄宿獨山精舍夜讀書往往達旦貴官以金帛聘不往客金陵遇故人子貧甚賣畫以助渡湘水見覆舟者傾囊營救畫得郭

恕先遺法著有台岳遊草怡廬集六法品彙鏡古錄

伊志

沈廷燦字瞻雲副貢讀書能文負氣節善草隸詩有僅存

稿鼠餘集

伊志

陸璜字玉田廩生好讀書尤邃于易家無擔石非義不苟

取勗子弟以善道著有昨非錄

于志

張誥字士周監生尙氣節好義舉與人交胸無城府人有

過輒面斥之咸稱長者著有耜洲詩鈔十卷

于志

馮士模字冠雲歲貢生性方直書法擅一時

于志

沈上垣字映梧諸生冲淡杜門卻掃著書自娛

于志

錢祖亮原名慎字惟寅嘉慶時舉人攻苦力學工楷法

于志

陸錫智字若愚嘉慶甲戌進士銓選嚴州府學教授任滿

例得保舉遽歸以詩文自娛多沈博絕麗之作家徒四

壁竟自忘其貧云

于志

朱鍾字應黃布衣居乍浦北郭食貧勵節酷好吟咏道光

元年郡縣保舉山林隱逸力辭居常衡門雙掩樵蔬不

給親故或以錢米相濟苟非其人不受也著有古白山

房詩

于志

陸子鑰字非池諸生博涉經史兼精青囊青烏家術書法

古勁性鯁直邑有善舉輒竭誠贊襄曰吾無力藉以自

盡其心耳弟超曾字東海恩貢生性耿介不妄取有王

某者延課其孫有成效王欲割田贈之堅不受銓選孝
豐縣教諭卒于官于志

蔣元字大始諸生自少潛心理學家貧授徒手抄儒先書
積卷盈帙遇有詆毀程朱者力斥之著有古文載道編

救荒補編叢桂堂詩文集于志

胡霽雲字叔玠增廣生苦志力學于洛如吟社中詩最渾
雅兼工篆法所鐫印章得漢人遺意著有瓦鳴集于志

孫始然字肇明早孤事母孝讀書過目成誦率三弟閉戶
窮經寒暑不輟著有研巢詩存于志

宋景關字介郿歲貢生博覽墳籍勤于撰述乾隆四十四

年延修邑志五旬脫藁復作糾繆二卷嘗選刻龍湫等
書著有乍浦志桑阿吟屋藁劉暄字漢漁庠生有雋才

早卒著有燃藜閣詩草于志

陸烜字秋陽庠生廢產購書銳意著述兼通岐黃家言性
嗜山水嘗遊四明天台北涉江淮所至以醫自給著有

書義梅谷詩文集于志

屈宗到字芟香乾隆丁酉舉人幼有神童之目年十三為
庠生工詞賦及楷法沉默寡言篤于孝友卒年僅三十

九弟宗建字楚材乾隆丙午舉人研精經術為文有法
度其才蓋與兄相埒云于志

王錫圭字翰周乾隆甲寅舉人家貧力學讀書恒至丙夜
著有禹貢地理考證于志

鍾衛字箴抑廩生刻苦勵學讀書恒至夜半居一市樓終
日危坐為詩文銳目劇心往往多未經人道語著有小

市樓詩集弟晉字士升貢生善詩文尤精經學少與兄
衛齊名性孝友行狷潔家無擔石泊如也著有周易象

義觀通春秋往例質疑詩文集諸書于志

賈朝琮字公桓乾隆辛卯副貢學問淹通留心經世之略
平生足跡半天下故于河渠形勝諸說尤能得其精確
教子弟務為實學期于有用晚居竹溪自號竹溪漁父

栽花種竹以著撰自娛有嘯軒偶筆詩集次子敦臨原
名漢字卓人號蘭皋道光壬午舉人早卒著有守約齋

橐于志

徐光燦字鳳輝諸生少好遊嘗歷赤城華頂諸勝中年患
咯血習養生家言遂棄舉業隱居清溪工詩善書尤精
琴理有霹靂引一曲乃北平韓鼎所傳于李延是者光
燦得之為時獨步重游泮宮荷金帛之賜年九十五乃
卒著有山影樓詩存琴譜姪孫軹字雲尉諸生性兀鼻
善為詩著有鐵匏樓詩于志

張誠字希和乾隆丁酉舉人內行肫篤矜名節重氣誼勇

于為善人所難必以躬赴嘗倡舉瘞骼會瘞枯骨一萬六千有奇嘗為五嶽之遊西陟峨嵋北窮醫無閭足跡半天下洞綜羣籍工詩古文辭同時諸名宿交推重之著有嬰山小園詩文集子湘任字宗輅嘉慶己卯舉人事親孝誠善著書而晚年落寞寡歡湘任能日為詩文以娛親鄉舉後以奉母故不赴禮闈者數年事親黨有加禮與人交必信博學能文嘉慶十六年恭應

西巡

召試取充文穎館膳錄著有抱樸亭詩文集

于志

張論字春農增貢生候選訓導性純孝年十七遭父喪三年不離苫次母在堂終身不遠遊吳菘圃相國雅重之

欲為援例納粟以母老辭與屈何煥明經交厚花晨月夕對局手談何煥卒作廢弈圖以見意有知人鑑朱椒堂漕督未遇時早以大器日之著有春農草堂文集於

斯軒詩存

新纂

胡昌基字星祿副貢生力學工詩文牖啟後學甚眾嘗輯嘉郡康熙後百餘年詩以續沈季友樵李詩繫遺聞軼事綴述頗多著有石瀨山房詩文集長子金題字品佳廩生才力富健工詩詞著有桐華館詩金屑詞次子金勝字東井諸生才亞于兄著有聽秋室詩笛家詞

于志

陳謨字汝師貢生父兄年皆逾邁事之能得歡心性倜儻

遇不平事輒持論侃侃家貧以授徒為業博極羣書工古文辭著有拙修文稿讀左偶摘讀史偶摘等書子璞字國器少聞謨教有志經濟閉戶著書有時務臆說行

世于志

徐志鼎字調元年三十猶困童子試乾隆甲午發憤入太學聯捷成進士乙巳謁選得南溪令期年以盜案落職旋主東川書院課士務實學蜀人愛之五十五年入都祝

釐恩復原銜留蜀幾十年始攜家歸性孝友為詩出入唐宋晚歲專學昌黎著有吉雲草堂詩集紅亭日記于志

孫熊字襄益乾隆甲辰召試

行在以歲貢候銓訓導歷署開化龍游奉化教諭捐資重修文廟修補祭樂二器創立育嬰堂并助貧士之不能鄉試者諸生感激去任時至繪攀轅圖題咏成集為文出入經史兼好吟咏著有越中吟編柳居詩存等集于志

徐夢熊字漢雲諸生性孝友年十五授徒供菽水生平好義舉精於醫全活無算嗜古文辭無體不攻書法出米蔡間著有漱芳閣稿以子士芬貴 贈朝議大夫于志

邵澍字作霖有才畧乾隆五十年荒旱無業之徒乘勢攘劫澍請于邑令遣健役分曹巡歷又效李崇村置一鼓

法晝夜警備一鄉賴以無事長于詩兼精醫術著有修竹廬詩三卷成方輯要四卷族弟澂字靜瀾亦工詩著有方滋集弟源著有花間草堂詩一卷紅柳詞一卷于志蔣殿原名濟字叔苑乾隆甲寅舉人工詩書遊嶺南楚北間著有敝帚集江行雜咏弟澧字秋舫嘉慶戊辰恭應天津

召試

欽取二等是年中順天鄉試官湖北通城縣知縣勤于莅事罷官後僑寓楚中以課徒自給著有春煦秋陰館集于志張躍鱗字振之乾隆乙卯舉人一應禮部試歸而養親不

復出從祖景陽嘗輯當湖人文逸各附小傳躍鱗續之邑中抱才不遇之士賴以畧存梗概又助修縣志搜討之力居多著有摛庵詩稿于志孫燾字暴桑篤志經籍嘗病宋儒言詩者盡廢序說置古義不講因著毛詩說三十卷又有周易虞義補春秋公羊說等書發明漢學姪堂嘉慶辛酉舉人亦精經學嘗集漢魏二十一家易注儀徵阮公元稱其精核云于志鄒璟字元培諸生援例授職州同性穎敏工詩文為人通曉世事乍浦向有九山志體例未備璟發所藏省府州縣志及故實之散見他書者纂乍浦備志一書于海濱

文獻頗為賅洽著有南園雜識乍浦竹枝詞于志

陸坊字禮約烜子嘉慶戊辰舉人銓授永康縣訓導學問

通博尤長于詩官况蕭然仍以授徒講學為事著有草

心亭詩于志

沈正楷字登雲嘉慶癸酉舉人勤學博通史事為文才思

橫溢丙戌大挑知縣分發廣西署河池州尋病卒于志

許河字右清副貢生性和易敦孝友篤好漢儒之學自許

鄭以下靡不探討手自鈔錄者不下三四十種著有袁

文後案乍浦續志諸書于志

陸錫謨字明諧廩生性耿介博學能文深于漢儒之書著

有詩經考證于志

辜典韶字夔珍生平篤學不倦博覽羣書著有篆隸備攷

荻林詩草芸閣文集又精于六書日本嘗求其字刊石

者有普濟庵廟碑咸甯公所碑陰文一篇于志

戈志熙字虞三庠生少穎悟年十七題鬱輪袍傳後詩見

賞鄉先輩長益耽吟詠有宋人風格其行文不肯一字

拾人牙慧居北溪鍵戶著書踰艾齋志以歿著有海東

酒徒外集管窺草平湖路志

朱維謹字臨軒號蓼浦庠生耽吟咏嘗之蘇州謁沈尙書

德潛聞人見其貌寢弗與通方爭辨間適德潛出見之

問姓氏曰詩人也揖之上座生平寶愛一木瘦出入與俱人因呼為木瘦居士著有東湖志東田集四卷慎齋

集六卷

平湖路志

費世鑑字損廬廩膳生遜志力學博覽羣書大興朱文正校士禾中世鑑與同邑黃欽阿屈橋如均列高等時費患耳聾屈患背僂黃患足跛文正顧而歎曰天之困阨斯人也世鑑歲科校冠軍者再中年後絕意進取以課徒終惜其著作已佚

新纂

路德成字升階號蘭江邑庠生性樸實與里中陳謨蔣元為素心交皆以文學名平時覃精三禮於儀禮致功猶

力朝讐夕考寒暑無間

乍浦備志

葉莊字守箴號竹莊童時賦新月詩為族祖之浴所賞後因病廢制舉業專事韻語入洛如續社晚年梓其咏物詩為籬邊石畔吟及古今體詩二卷以布衣終

平湖路志

屈何炯字公望號芥舟橋年子工書法性方嚴不為勢屈其祖墓在吳興勢家啗以重利不為動有司乃斷歸屈氏彝訟之大府勢家啗以重利不為動有司乃斷歸屈氏嘗監當湖書院出家藏張楊園陸清獻全集並儲於院俾後進知有程朱正學院南橋圯易而新之

新纂

徐應潮字渭陽號夢春襟懷坦直居西郭矮屋數間座上

客常滿學使山陽汪文端公奇其文俾食餼後有某氏者故阜隸也府縣錄送其子姓將與考應潮持不畫諾

某學使婉言諭之卒不畫尤通五行堪輿岐黃家言新纂

陸樹蘭字敏滌號西廡邑庠生家貧力學擅六法精篆刻

尤嗜為詩與徐熊飛楊于高袁路先相唱和兄歿事寡

嫂惟謹兩弟先卒哭之慟著有抱月軒詩鈔當湖明舊遺詩彙鈔

纂

陳珍字禾獻號愧莊謨子邑諸生弱冠即從事經濟之學

不求速化三年大比足迹罕至好讀陸忠宣公集又耽

常熟顧氏方輿紀要一書手錄至數十冊既落落無所

遇乃終身為童子師著有從吾好齋古文稿新纂

毛猷字誦葭號柿莊歲貢生博通典籍著書授徒竹籬茅

舍誦聲隱隱出百步外時金平華婁四邑裹糧從遊者

接踵悉心講畫時時以行詣相勗年六十餘猶重施爨

鬻雪鈔露纂時字字作蠅頭細楷著有引書海錯廣編

珠左國聯珠七柿軒隨筆詹詹錄紅柿村居詩鈔等集

新纂

黃金臺字鶴樓歲貢生綺歲才名噪甚嘗從武康徐熊飛

遊與之上下其議論故所作詩文皆有法度文體宗徐

庾而兼通百家江南北士夫之有著撰者弁首文金臺

手筆居多好交游繪扁舟訪友圖名流題詠咸豐丁巳
 臨川李聯琇廷尉督學江蘇延入幕爰徧歷江淮諸郡
 登焦山與諸名士宴集振衣千仞俯臨大江作文以紀
 壯遊生平廉潔自守剛腸嫉惡雖面刺人過失不諱遇
 流俗不妄交一言而後進有片長輒樂為延譽辛酉平
 湖再陷憂憤成疾卒刊有木雞書屋駢文集三十卷詩
 集六卷左國閒吟一卷又有今文愜盛藻集未刊新纂

施汝懋字桐生號笙六父鏗字蓮峰歲貢生著十三經註
 疏彙纂燬於兵燹汝懋由廩膳生中道光辛卯副車已
 亥領鄉薦四上春官不第絕意進取秉性純孝居喪哭

泣目幾盲晚年就金方伯以誠之聘僑寓京江以文字
 就正者門墻更盛終以是邁心疾卒著周易集解辨新纂
 林壽椿字雪巖廩膳生窮究經史工詩古文辭為武康徐
 熊飛高弟與陸鎔齊名晚年隱居東溪著有菊泉山館
 詩文集八卷新纂

陳錦字蘆雪號板橋恩貢生性豪邁不羈工詩與黃金臺
 莊敬齊名時稱蘆川三異人晚年崎嶇兵間以耿介不
 苟餓死著有蘭芳堂詩鈔新纂

王均字平治號夢閣歲貢生負雋才善屬文生平勤搜文
 獻見鄉先哲遺集積鈔至三百餘家為柘上遺詩續編

秉性恬雅勇於為善嘗獨力建東湖濱石梁邑人德之

著有暢真機室詩稿新纂

徐金泰字步巖號吟槐穎悟工文舉道光甲辰鄉榜事親

孝兄弟同居無間言性慷慨有戚某某假千金皆弗能

償還其券已酉大水傾困賑里中晚年修宗譜置祀田

邑人稱之著有國語約編公穀約編棣兩閒談等集新纂

徐金誥字登陞號逸帆邑庠生年甫壯即廢舉子業專心

學古文清俊拔俗尤長於論事晚歲家益貧以醫自給

著有春暉堂集已刊春暉堂文集序

丁泰字禮安號卯橋舉嘉慶丁卯鄉試丁丑成進士經藝

沈博絕麗尤為試官擊賞官中書清謹自持文守理法

宗歸胡駢體亦沈酣經籍詩不多作出語真摯尤篤嗜

經學言通經必自小學始小學以爾雅說文為宗二書

明而羣經可不煩言而解瘠弱多疾雖藥爐在側卷籍

未嘗釋手著有菽廬札記一卷僊菽廬詩集四卷新纂

顧邦杰號荅坪邑廩生性冲和雖接卑幼未嘗嚴峻與王

廉訪大經黃明經金臺相友善樽酒論文老而彌篤學

詩於武康徐熊飛工為五言體冲夷綿邈深得王孟韋

柳家法刊有橫山草堂詩集新纂

陸潢字孔愉號松坪郡廩生性廉直嘗面斥人過不諱一

介不與取布衣徒步自得也粵匪平後確訪忠義節烈輯為一編使後來修志者有所採擇卒後教諭山陰嚴嘉榮輓以聯云氣數難延仁者壽性情猶見古之矜可以知其概矣

新纂

沈筠字實甫號浪仙食貧嗜學以母教遂研索典籍自六經三傳莊屈馬班而下莫不漁獵菁英以發抒文藻詩名傳至日本晚歲敦重名教凡忠義節烈事及耆舊詩文殫心採輯今賴以存者皆筠力也有乳水流芳錄一卷瑤池冰雪編一卷壬寅乍浦殉難錄一卷龍湫嗣音集十二卷守經堂詩集十六卷已梓蜻蛉洲外史十二

卷日本紀略一卷海上文徵八卷滄海遺珠編二十四卷守經堂困學錄八卷未梓

新纂

朱錫山字魯東自號雀橋布衣少失怙讀四子書畢舍經而鋤力田以養母年三十五復理舊業為童子師暇輒吟詩得力於武康徐熊飛著有朱布衣詩鈔

朱布衣傳纂

賈敦復字蘅石季弟敦良字芝房副貢朝琮子均以文行稱元和朱綬謂敦復詩清靈深湛敦良詩尤深蘊有致為古文宗法震川脩潔自喜各類其為人敦良與顧徵士廣譽交以道義相切劘性和而介與人言有刺謬即默然背其面後皆以諸生終敦復著有知止堂詩集敦

良著有餐霞僊館詩文集新纂

朱為霖字雨甫為弼弟附生氣岸不凡讀書觀大略從陽湖孫星衍婁縣陳廷慶講學益進試屢不利乃貲為丞署南昌縣丞條上巡撫程公含章數千言陳所疑四事辨儒吏尤精慎巡撫批答優獎旋權贛縣事懲庫吏之蠹民者比受代以疾卒著有似山堂詩二卷樂府一卷遺文一卷季弟為燮字理堂附生與嘉善郭麐錢塘陳鴻壽倡和皆推重其詩清婉芊絲有金風亭長風味著有傳石齋詩集新纂

錢炳奎字肇祥號蔚也同治丁卯舉人好讀宋人性理書

遊同里顧廣譽之門業益進性剛直東湖舊屬陸清獻

祠兵燹後湖濱新淤漸為民佔炳奎力陳當道卒收淤

歸祠又與諸生時元勳監生戈為鵬講明 文廟丁

祭禮樂園橋觀聽一時稱盛惜中年卒新纂

屈傳銜字冰卿家貧教授手評口講積久則輟業竟日邀

友手談或博塞酒戰以怡暢其神閱夕乃勤懇如故道

光戊午膺鄉薦仍守硯田不預戶外事光緒丙子成進

士以知縣分發陝西忽遘疾歿於差次惜之新纂

隱逸

明

沈維鏞字宣卿十歲工詩文二十領鄉薦試禮部戚屬趙
文華陸炳交為之地維鏞知之即托病歸終身不北上
又屬吏部授以官亦不就肆志湖山詩酒間朋輩言偶

涉利祿去之若浼

平湖張志

陸光宙字與常幼孤邁家難匿車中遁蹟京師年十六補
順天弟子員聞母訃南還隱居郊園與宋旭璩之璞輩
結文酒之社年八十有六夢一道士持陶靖節小像索
題諦視之即已也援筆題詩其上翼日遂逝著有鋤餘

集子公鏐字芳淑有志行學者稱蒿庵先生樵李詩繫參明詩綜

吳志

李天植字因仲崇禎癸酉舉人易名確字潛夫明亡偕婦遁居龍湫山長吏守帥聞其名訪之輒踰垣避家極貧無子手製棕鞵劈竹爲器以易粟粟往往不繼或遺之弗受也甯都魏禧至海上造其廬耳聾出粉板令禧書所交遊及出處乃顧禧泣遺之錢五反禧自謝非盜蹠物然後受禧遺書曹侍郎溶周青士篋曰潛夫古之難衣食者然設將以禮敬亦有可受之道天植終堅拒之尋以餓死鄉人私謚介節祀鄉賢同時有鄭嬰垣者亦

乍浦人窮老無妻孥孤介絕俗至凍死雪中與天植爲莫逆交云著有蜃園集九山志隱林列傳表忠錄灌園錄諸書嗣子燿字明也號果庵性愛山水有遍遊五嶽之志從子爲光字宛星號蔗郵諸生天植死燿亦繼死遺稿散軼爲光搜輯編次之著九山續志浙江通志參魏叔子文集

樵李詩繫

馬嘉楨字允和嘉植弟崇禎己卯舉人居家有至行明亡不復出爲頭陀更名宏任號宗顏工書畫所作詩文臨

卒悉令焚之弟嘉相讀書不應試微獻錄參平湖朱志

過銘簞字叔寅御史庭訓子年十九中萬曆戊午副榜庚

午下第黃道周以有司失人為恨乙酉避兵紫梅山值
歲薦不就尚書陳名夏以書幣迎却之杜門讀書歲時
不給無所愠年八十六卒著有性道筌蠹魚稿子澤廣

諸生 平湖 未志

楊九垓字孚九諸生有才節好讀史論天下形勢如指掌
所交皆四方賢豪崇禎季年感時事欲詣闕上書母以
為無益于國止之馬阮擅權入孝陵慟哭中酒輒謾罵
無所顧忌工書畫求者不可得或醉之酒則揮灑不惜
家貧無子年八十卒 平湖張志參 橋李詩繫

姚世勳字元仲天啟甲子舉人甲申後隱居讀易賣卜邨

寺著有易贖講義 平湖 朱志

國朝

陸夢求字配衡諸生家東湖濱沙浪茅屋臨溪資浣濯通
往來鄰業漁讀書暇相與敲鈎結網興到乘舟登弄珠
樓或十杉亭見人眾即鼓棹去酒半醺檢手蒔花草領
生意閒作吟詠語皆野趣隨筆作書不摹帖非晉非唐
脫然塵壒之外 當湖 外志

藝術

明

陸鑾字克和七歲能詩廣州知府沈琮見而奇之以其弟

御史埭女妻焉成化間以善書徵授鴻臚寺序班平湖志

曾和乍浦所人正德間與朱端並以畫士直仁智殿二人

少貧甚業樵漁端嘗入山遇一異人授以筆和亦跪乞

遂各授一筆忽不見後兩人用筆隨意皆殊絕九山志

孫官字德懋嘉靖時人能為古文辭楷法道勁大字雄俊

有神采林鳳華字子夏號丹壺居士萬曆時人精楷法

在右軍大令間書畫譜

陸金字雲峯自華亭徙平湖子道光字明暘精兒科洞達
 物理不拘成法多奇驗道充字賓暘諸生亦精醫有陸
 氏金鏡錄道光子從諭道充子詰別見唐守元字吾春
 璜溪人贅于陸遂傳其業袁化祝氏兒患痘遍身血迸
 無罅守元搗藥塗其身復滲藥裯褥上捲兒倒豎家人
 駭之曰此名蛇殼痘氣必用逆乃得殼已果皮膚解裂
 如蛇蛻然新帶顧氏兒痘後目瞽守元曰惜遲數日不
 得卽效當先開一目三年後乃俱復明果驗著有醫鑑
 醫林繩墨後金鏡錄吳悅字三峯少讀書明敏遵危疾
 遂請醫徵爲太醫院使全活甚衆熹宗三賜金幣

平湖程志

張軫字漢聚精痘科率以意爲治多奇驗得錢輒以資戚
 族之貧者

袁志

陳鼎正嘉間人讀書好古善鼓琴陸堯化字和鄉以羸疾
 放懷山水善琴著琵琶行白頭吟蘭亭秋興答蘇武書
 凡百餘譜

徐同亨字介如性沈靜工書不輕作傳者絕少俞恩煥字
 二酉諸生負才尙俠工書董文敏其昌欲致之不赴有
 五如逸稿

馬德澄字若水童年膂力絕人善騎射精書畫篆刻自號
 雪林山人有摩尼集

國朝

過澤充字涵輝府丞庭訓孫能詩工書行草師右軍大令

楷法得顏平原神骨詩有棠溪倡和集

以上平湖朱志

沈信字驚濤諸生好擊劍工草書甲申後棄舉子業築舍

城南顏曰借園有借園詩草

胡湄字飛濤諸生樵李項氏藏書畫最富湄以戚屬得縱

觀摹做點渲蟲魚花鳥有生致性耿介貴人以金帛乞

畫多拒之孫璞字振齋亦能畫

以上吳志

戈守智字達夫諸生工書嘗游邗江漢陽遇碑碣輒手自

摹拓著漢谿書法通解八卷

伊志

黃賞侯乾隆時新廟里農家子日至羅灣廟攫酬神餽餘

供醉飽偕苦之禱神求毆夢神告曰彼天醫星也迎接

不暇奚敢驅至新倉長壽庵見漿紗女繞後猝抱腰女

怒其黷也將毆之黃曰爾心胞痘卽發必驚以洩之否

不治我留宿俟頃之果見點後以負租繫府獄適太守

幼子痘危有薦之診者命急取牛糞煨灰裹兒夜臥其

中明日黑皆變紅色治他痘神效類如是

當湖外史

陸宙种字步衡號漁六家世顯貴不樂仕進善畫金碧山

水花鳥近陳白陽兼工人物嘗館松江張文敏公照家

其戚也每畫照輒爲題詞人稱雙絕

平湖路志

陸二龍字伯驥台北苑石門而化之烟雲滃然意在筆墨

之外陸錦雯字溇高號杏村居士山水師張鳴謙有出

藍之譽詩文修潔不樂仕進陸烜字子章號梅谷又號

巢雪畫潔詩工有梅谷集圖繪寶鑑續兩浙名畫記

戴陞字六階號松垞山水蒼古幕游四十年足跡半天下

年近七旬寄迹吳門求者頗眾墨香居畫識

丁琳號甘山妙繪事及行楷少承父志述三易生平好接

異人天文地理以至馬杜二氏之學無不精通有香草

庵草兩浙名畫記

張培字抱一自號畫禪或作徐大行善山水有文譽無子以醫

顯疾革取書畫古玩并罄囊中金散諸良友翛然而逝

縣志

張坦字青蘿得雲間沈士元法有幽風桃源諸圖珍於時

子篆工花鳥縣志

楊泰基字瞻岳號海農布衣善指畫山水宗馬遠縣志

高汾字晉原工設色花卉高沆號秋艇花卉直逼暉格有

浣花居吟草墨香居畫識兩浙名畫記

徐日嚴字慎齋以醫行世窮鄉僻壤足跡恒徧不以寒暑

間其有貧甚者輒解囊以供藥餌

何清字茗庵性和厚束身名教樂善好施工于繪事為秀

水張庚高弟乞畫者非其人不與也

張世求字繼周監生一應鄉試報罷遂棄舉子業專心六法善山水宗法元人

方樹本字根遂監生平生重然諾所交多名下士善鼓琴蓄書畫甚富並工於詩著有詠花軒詩稿其弟樹勳字漁山亦工書尤善畫蘭

張廷章字文江庠生操行方嚴為醫活人無算手評醫書數十種有救偏瑣言評本行世子師敬字懷九庠生師厚字欽渠監生俱以幼科傳師英字書鳳歲貢生以方脈著亦皆名重一時

參平湖路志

戈朝榮字瑞齋庠生精岐黃術尤長于幼科羣醫所不能療者治之立效子恩字少懷武生亦精幼科博綜古今治法而能參其變著有育嬰常語

顧榮字希曾諸生性沈默治金瘡科甚驗有被刃傷而垂斃者醫之多得活

夏鼎字禹金諸生精壬遁之術有客過訪輒預知其姓氏百不失一

潘晨暉字舜明善畫山水花鳥人物落筆生動得天然意趣品在胡飛濤顧松仙之間

葉恒字巨峯工山水得文沈董王家法性坦率不善治生

往來吳越間賣畫以自給一水一石人爭寶之以上皆于志

陸東山以字行精於弈當湖自三張沒弈道中衰嘉慶中

東山崛起幾無與爭白者比歸隱西郭外楓涇費春山

來對壘且猶不得志而去俞銓蹶泂集

王範字誠之號南村太學生博通史漢善筆窠書狂草有

綠天庵僧之致花草蟲魚絕似宋元人小品中年後好

鼓琴與海東徐光燦交指法益精北平韓畱所傳於李

延是者有霹靂引一曲先後造就為時所稱新纂

陳啟雲世業醫嘉靖時倭寇內犯泊舟於乍謀深入多病

疫者其酋索醫得啟雲始至不肯診治臨以兵則曰若

母深入我為療治酋許諾要之誓而處之方俾煎數十

鍋病者牛飲之不數劑病皆已酋大喜揚帆去乍浦備志纂

宋景洛字紹程精卜筮星命奇門六壬熟九章法及西洋

度算年四十餘盲於目冥思頓悟益得其深所著有九

章集成四五十萬言罕有能讀之者晚年境益窮以餓

死陳謨有詩哭之云貧憐馬磨牛衣甚術較唐都洛下

精乍浦備志

周保極字彝範號晴川工指頭畫能作山水花鳥尤善畫

鱗劉琴梓號松聲善畫雞均家乍川晚境皆貧藉畫直

自給乍浦備志

吳元臣字召勳號墨冶鐵筆蒼勁作印譜二卷宋景闢為

之序

九峯文鈔

許汝敬字迪安號遂庵鼓琴吟詩兼工花卉得陳白陽風

趣家黃山麓構小園秋時時菊百餘本對花寫照無一

筆涉畫史習人以許菊稱之著有菊洞天詩詞草

新纂

陸修潔字子廉號篠坡工詩文善鐵筆畫山水師石谷子

亦能花卉家藏有陸清獻墨跡因名其堂曰寶文以誌

仰止名賢之意有寶文堂詩文集

新纂

流寓

明

葉紹袁字仲韶南直吳江人天啟乙丑進士歷任工部旋

去官乙酉後避兵平湖居馮氏耘廬著有欄塵集子燮

字星期寄籍嘉善成進士知寶應縣有己畦詩文集

平湖

朱志參
吳志

李延是字辰山初名彥貞字我生南直上海人寓平湖之

佑聖宮少負逸才以經世自命不得志乃學醫於季父

士材有延之治疾者雖遠必往疾愈不責報或酬以金

即購書坐臥一樓蕭然物表晚年黃冠草履自稱道者

疾革適秀水朱彝尊至乃出所著南吳舊話錄暨放鵬亭集并以所儲書二千五百卷畀焉瘞東湖濱有藥品

化義醫學口訣脉訣彙辨痘疹全書行世 曝書亭集

柏古字斯民江南華亭人寓居平湖工詩詞書法性散誕

不羈嘗出見耕牛揖之曰是不素餐者或塗脂粉為婦

人裝曰非此不諧俗人呼為柏癡晚徧訪匡廬天都林

屋諸勝歸平湖卒有雪耘詩集子立本字哈山年未冠

畫理精妙與父偕隱泊如也亦能詩 張志附新纂

國朝

萬六吉字新孺江西南城人落落不與俗合甲申後棄家

遨遊山谷間無定蹟後寓當湖館于化城庵卒殯庵後

吳志

韓畱字經正順天大興人性孤潔工詩善鼓琴能作霹靂

引為世絕調不授人人亦不能學以故無傳者畱終身

不娶遍遊諸關塞嘗僑居越中後寓當湖有天樵集 平湖志

朱志

葉舒崇字元禮江南吳縣人寄籍平湖年十二補弟子員

成進士選中書舍人戊午舉博學鴻詞未試卒有謝齋

詞二卷 吳志

翁嵩年字康館仁和人以進士授戶部主事督學廣東瓊

州在海外學使者檄生童附試雷州嵩年曰豈可以一人易千萬人命乎竟渡海後著為令既歸卜居東湖得

沈氏園顏曰村南煙舍每花晨月夕與湖中詩老觴詠

其中有村南煙舍詩天香書屋稿

浙江通志參小石林文外

王廷燦字孝先錢塘人舉人歷崇明知縣歸貧甚挈

家居當湖陸氏園與翁嵩年賦詩娛老有似齋詩存子

延年字介眉舉人官翰林院侍讀有東湖移居詩

平湖高志

黃厚燧字復光諸生松江人隨兄徙乍浦工書有魏晉人

風格著禹貢尊原又有書權書教等篇發明六書

乍浦志

鄧夢蛟閩人遷居平湖乍浦遂入籍性剛正喜施與立永

興綱為議事所周濟孤寡助客死之家屬扶柩經費凡

諸善舉無不樂於倡始

于志

余鵬年榜名鵬飛字伯扶號蕊幢懷甯人舉順天鄉試詩

筆清健剡刻一洗纖軟之習李贄芸宰平湖延主當湖

書院攜家來住院三載訓迪得士心士亦多所成就其

教人始小學而徐及經史百家學問賅洽嘗疏一觚字

至千餘言他文類如此後訪舊揚州卒所著有夢牋詩

屋詩七卷牡丹譜一卷

吳鵬字雄飛以籍本浙東號鑑湖讀書不屑為章句之學

嘗自西蜀徧遊秦晉燕趙齊魯間無所遇而歸奉其母

居平湖之清溪喜為詩雄駿之氣直逼盛唐晚年遷居

乍浦自稱城西種菜翁與徐熊飛伊杓朱鍾相友善每

多唱和卒年七十有四著有鑑湖詩藁

乍浦備志

陳文藻字愚泉海甯人少孤流寓乍川業櫛工以養母弱

冠嗜學喜為詩得伊杓指授詩益工何司馬太青甚重

之然性傲岸卒以貧死著有鏡池樓詩稿八卷已梓

嘉興府志卷五十九 陳文藻字愚泉海甯人少孤流寓乍川業櫛工以養母弱冠嗜學喜為詩得伊杓指授詩益工何司馬太青甚重之然性傲岸卒以貧死著有鏡池樓詩稿八卷已梓

